

DOMA YACNOCQUIDON ISTE

Tauamboen chiaid

¹ Esuquidistun yuambo Pabado nebi. Aidën: —Ëbi chuibeneta —caidquio nebi. Adembidi Nuquin Papantsen: —Con Mado chuibeneta —caidquio nebi. ² Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. ³ Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec. ⁴ Aid abipadquid icsaisa icsho Nuquin Papan: —Con Mado yec abitedishun Icbo neque. Matses tantiamenu —quequin uincuemepac caondash. Aidquiobi Nuquin Icbo Esuquidistu nec. ⁵ Aidën: —Pabado chuibeniac isadaidpembon matses utsibontsen ma ëbi tantiaquin ëmbi chiacpadomboen nanu —quequin ambi naid chuibenequidquio Esusën icmepondashi. ⁶ Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. ⁷ Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuedquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

Doma yacnocquido iste Pabado bunaid

⁸ Tantia. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “ ‘Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa

chianembi. ⁹ Aden mibi bëshunenquoio icquin Nuquin Papa chianembi. ¿Muectabi nepe? Padenquoio. — Pabadon abimbo chiosh —quetsiash Nuquin Papa abi tantiaquidquoio icquin ěmbi aton Madon naid chuibenenuc. ¹⁰ Nadembidi Nuquin Papa chianembi. —Doma yacnocquido istantiadquoio iquebi. Mimbi nidmiac něbi nidtsiabi, Papa —quequin chianembi. ¹¹ Aden mibi istantiadquoio iquebi. Miběd icquin Nuquin Papan chiaid chuibantsiambi. —Nuquin Papan Mayaněn tantiamiacpadomboen chieshtoenquoio icquin Esus tantiaquionona —quequin mibi chuibantsiambi. ¹² —“Chieshtoenquoio icquin Esus tantianuna,” quec chuinanec bědamboec tabadec aidoběd bědambo ictsiabi —quiash mibi iste bunebi.

¹³ Tantia, con utsibo. Mibi yacno ěbi nidtsemboed mimbi tantiabien icchiteque. Mibi chuinu. — Shubu dadpen icquid Doma yacnocquido istanu —queuidqueuidobi. —Nidnu —queshobi Nuquin Papan nac nidenquoio iccobi. —Ěmbi Esusěn naid chuibanac matses utsibon dadpenshun Esus tantiabenacpadomboen ma Doma yacnocquidon utsibontsen Esus tantianu —quiash mibi yacno nidtiadquoio iquebi. ¹⁴ Esuquidistun chiacpadomboen ambi naid matses abitedi chuibantiadquoio iquebi. —Dadpen tantiaquidobědtabi tantienquoio icquidotsen chuibenenu. Adembidi dada uaquidobědtabi dada uainquoio icquidotsen chuibenenu —quiash nebi. ¹⁵ Aden chuibenequi shubu dadpen icquid Doma yacno nidshun mibitsen Esusěn naid chuibantiadquoio iquebi.

¹⁶ Esusěn naid chuibenec bědambo iquebi naden tantias. —Nuquin Papan tantiacpadece matses cuidmenquoio icnuec Esus abided cuidadec uněsac caondash. Aid tantias. Nuquin Papan matses cuidenquoio iquec. Abia chiaidon isadaidbon Esus tantias. cuidenquoio icquin isadaidpembo matses

utsibontsen Esus tantiasho Nuquin Papan cuidenquo iquendac —quiash Esusën naid chuibenec bēdambo iquebi. ¹⁷ Esusën naid chuisho tantiash nuqui naden tantiec. —Nuquin Papan chiaid niac-niacboedombi Esus tantiasho Nuquin Papan nuqui bēdamboen isbenec ambi chiaid niac-niacacmaidbimboecnuc —quequin nuqui tantiapec. Adembidi chuiquin Nuquin Papan isadaidbo tsusedpa dada uamepampic. “ ‘Nuquin Papa ambi chiacpadomboen naquidquo nec,’ quequin abi tantiec tabadquid Nuquin Papan bēdamboen isec,” quequin dada uamepampic.

Matses utsibo icsamboec tabadaid

¹⁸ —Abi tantiesa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadte bunquin matses dadpenshun Nuquin Papan cuidte tantiatiapimbo iquec. ¹⁹ Abi tantiametequid ambi uaid isun Nuquin Papa tantiatiadquidi Nuquin Papa tantiate bunenquo matses icpec. —Adquidshenda Nuquin Papa nepec —matses camenuen Nuquin Papan abitedi uapampic. ²⁰ Nidaid uaquinc cuēte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nēid uaquidien nadquo icchitec. Nibēdantiapimbo icquidien nechitec. Abipadquid utsi nibēdnuc comapenen tantiaquin nabanquidquo yec abitedishun Icboen nechitec —quetiadquidi adenquo matses iquec. Adquid Nuquin Papan cuidendac.

²¹ Ambi uaid isash: —Nēid uaquid bēdambo iquec. Aidēmbien ēbi nashunchitec —quetiadquidi pamumē-dacbimboecquin Nuquin Papa tantiatiapimbo matses iquec. ²² —Dadpen bēdamboen tantiembi —quequimbi

tantienquo matsesën iquec. ²³ Aden unëstiapimbo icquid Nuquin Papambo tantiatiapimbo icquimbi unësquiduidquo tantiaquin aidbimboecnuc nacnenshun papa quequin chianec. Utsibon matsesbimboecnuc nacnenshun: —Ëbi bëdamboen ista, papa —quequin ambi nacnenaid chiec. Utsibombic aben icquid nidaidën capuquidbimboecnuc nacnenshun adembidi chiec. Utsibombic uicchun podochoquidbimboecnuc nacnenshun adembidi chiec. Utsibombic aben icquid tacbidën siuidquidbimboecnuc nacnenshun adembidi ambi nacnenaid chiec. Ënden adquo matses yampicpadomboembidi nëbi adomboembidi matsesën naic.

²⁴ Adsho isash Nuquin Papa: —Ma bëdamboec tabadnu —queuidboedi icsamboecuidi matses tabadsho isash: —Ma ambi tantiacpadequi icsamboec tabadpanu —quiampampic. Adnëdambic nëbi abi bunacpadec icsamboec tabadec utsin chido chudteuidi bunquieci dada. Adecbidi aton bënëpenquo chudmeteuidi bunquieci chido. ²⁵ —Abitedi uaquidquo Nuquin Papa nec —quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. —Nuquin Papambobien bëdamboshë iquec —quequin ënenquo icquin chuitiadquidi aidon padenquo icpec.

²⁶ Adsho isash: —Ma abi bunacpadec icsamboec tabadpanu —quiampampic Nuquin Papa. Adnëdambic nëbi icsabudquieci dada bunenquo yequi chido daëdi dachudnanec. ²⁷ Adecbidi chido bunenquo yequi dada daëdi chichudnante natia bunquiopec. Aden ambi chiaid niacniaquec icsamboec tabadsho Nuquin Papan cuidendac.

²⁸ Adec abi tantiate bunenquo icsho isash: —Ma bëdamboec tabadnu —queuidboedi Nuquin Papa: —Ma abi icsate bunacpadequi tabadpanu —quiampampic. Adnëdambic nëbi pabiate shëcuë nibëdacbimboecquin

Nuquin Papan chiaid niac-niaquec icsamboec tabadpec bēdambo ictiadquidobi. ²⁹ Nadquido icsamboec tabadquido nec. Nēidic aton chidopenquio chudquido. Nēidic aton bēnēpenquio chudmequido. Nēidic icsamboshē icquido. Nēidic aton na dadpen bedteuidi bunquido. Nēidic chieshquido. Nēidic matses utsibobimboec icte bunec chieshēmēnquido. Nēidic cuesunianquido. Nēidic chieshēmēnquido. Nēidic muaquido. Nēidic icsa uate bunquido. Nēidic utsibo icsaiduidi chuiquido. ³⁰ Nēidic ambenquiobi chuishunquin chieshēnquin muauaquido. Nēidic Nuquin Papa chieshēnquido. Nēidic mamēnshumēnquido. Nēidic utsibo nashunenquio icquin aton nauidi naquido. Nēidic: —Ēbiuidtsēqui bēdambo iquebi —quequido. Nēidic: —¿Icsaquin atotsimbi utsi nape? —quec icsate bunquido. Nēidic anibēdtan amēn chiaid niac-niacquido. ³¹ Nēidic piushbimboecquin Nuquin Papan chiaid tantienquio icquido. Nēidic aton matses tantienquio icquido. Nēidic nēishash baded nēish bēdanenquio icquido. Nēidic utsibo bēdamboen istiapimbo icquido. Adquidtedi Nuquin Papan chiaid niac-niacquec icsamboec tabadquid nendac. ³² —Abi icsaid ėntiapimbo icquido Nuquin Papan cuidquin chian anēdēnquiacno nēsecaindac —quequin tantiequi ėnēdenquio yec icsaded-icsadedquec. Utsibotsen icsasho isash cuishonquec. —Bēdambo iquec. Ēbipadquidquio nec —quepec.

2

Matsesēn naid Nuquin Papan abimbo chuite

¹ Aden icsamboec tabadaid ėm̄bi chuisho tantiash: —Adquid icsamboshē iquec —¿quecta ique? —Aden naic aid icsaic —queboedi mibitsen adecbidi icsapēc. —Icsaquidpenquio nebi —quec mibi muaic. ² Nuquin

Papambien matsesën naidtedi tantiaquid icquin: — Nēido icsambo iqueque. Icsano nidmenu —quequin abimbo chiendac. ³ —Matses utsibo icsambo iquec —queboedombi mimbitsen Nuquin Papan chiaid niac-niacpec. Adash: —Nuquin Papan nuqui cuidenquio iquec —¿quecta ique? Mibitsen Nuquin Papan cuidendac. ⁴ Ambi uaido matses abitedi icsambo icsho isash unēsquio icquin matses bēdamboen iste bunquin icsaidobi Nuquin Papan baded cuidenquio iquec. —“Icsaboedi nēbi Nuquin Papan chiacpadec bēdamboec tabadtiadquio iquebi,” quequin ma matsesën ēbi tantianu —qeshun Nuquin Papan matses baded cuidenquio iquec. Abi icsaid ēnenquio icsho isun cuidendac. ¿Adsho tantiashta mibi nadpe? —Mua. Nuquin Papan ēbi cuidtiapimbo iquec. Ambi chiaid niaquesambo nebi —¿quecta ique? Adec onquec mibi muapec.

⁵ —Nuquin Papan chiaid niacboedēmbi ėnta —caqui: —Padi. Ėmbi naiduidi naic bēdambo iquebi —quequin ēnenquio icquin Nuquin Papan chiaid niac-niacbudec icsamboecuidi mibi tabadec. Aden mimbi Nuquin Papa cuidmendac. Nuquin Papan matsesën naidtedi chuite ushēmbi mimbi icsamboen naidtedi chuishun Nuquin Papan mibi cuidendac. ⁶ Matsesën naidtedi tantiaquin matses cuidendac. Bēdambo icquido abēdi tabadmequin icsaido icsano nidmendac Nuquin Papan. ⁷ Abi tantiec bēdambo icquido: —“Mibi bēdambo iquec,” mabi Nuquin Papan canu —quiash abēd tabadte bunec Nuquin Papan chiacpadec bēdamboec tabadec nec. Aido unēsacsho Nuquin Papan abēdi tabadmendac padpidec unēsti-apimbo icnuc. ⁸ Icsaquidoen Nuquin Papan chiaid chiaqui tantiate bunenquio icquin aton nauidi naic icsamboecuidi tabadsho Nuquin Papan comapenen cuidendac. ⁹ Adoac icsamboec tabadquido abitedi natiacuededec tabadendac.

Shubiquiendac. Con matses isadaidbo Nuquin Papan chiaid ambia tantiampidi icsasho cuidquin matses utsibotsen icsasho Nuquin Papan cuidendac. ¹⁰ Abi tantiec bēdamboec tabadquido unēsacsho abi yacno tabadmashun: —Nēid bēdamboec tabadquid niondash —quequin utsibo tantiamequin Nuquin Papan bēdambo icmendac. Ambia Nuquin Papan chiaid tantiondaido Isadaidbo abi tantiaquid icsho abēdi tabadmequimbi matses utsibotsen abi tantiaquid icsho Nuquin Papan abēdi tabadmendac. ¹¹ Icsamboec tabadquido icsano nidmequin bēdamboec tabadquido abēdi tabadmendac. —Isadaidboudtsēqui bēdamboen isembi —quenquo icquin adoendac.

¹² Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiashi aidēn chiaid niac-niaquec icsamboec tabadsho adembidi cuidendac. ¹³ Ambi: —Naden nata —quequin chiaid tantiashumbic adomboen naisa bēdamboen istiapimbo icquin ambi chiacpadec tabadquid Nuquin Papan bēdamboen istsiash. ¹⁴ ¿Ada Nuquin Papan chiaid tantiacmaidon matses utsibon bēdamboec tabadte tantienquo iccuededpec? Ma bēdamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bēdamboen naic Nuquin Papan chiaid tantiashumbimboen. ¹⁵ Adec bēdamboec tabadec: —Bēdambo iquebi —quequin ambembi tantiec. Icsamboec tabadec: —Icsachitobi —quequin adembidi ambembi tantiec. ¹⁶ —Adec matses abitedi bēdamboec tabadte tantiequi adquiec tabadenquo iquec —queshun Nuquin Papan chiacpadēn Esuquidistun matses cuidendac. Matsesēn otacquo tantiaidbēdta matsesēn ompoquin naidtedi ambembi tantiashun Esusēn matses cuidendac. Esus chuibanquin aden aidēn cuidte chiombi.

Isadaidbon Nuquin Papan chiaid niac-niacaid

¹⁷ Tantia, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidën tsyuecquid icsho Nuquin Papan ëbi bëdamboen isec. Utsibon Nuquin Papa tantienquoio icnubi Nuquin Papambo con matsesbëdtambi bëdamboen tantiembi. Bëdambo iquebi —mibi quepec. Adboedi mibi icsaic. ¹⁸ Nuquin matses tsusiobon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiapadec utsibo bëdamboec tabadsho isash: —Aido bëdamboec tabadec —queboedi mibi bëdamboec tabadenquoio icpec. ¹⁹ Adecbidi: —Nuquin Papan chiaid tantiacmaido Nuquin Papan chiaidquoio chuibanquid nebi. Paposhquiacbimboecnuc tantiamequidquoio nebi —mibi quepec. Adboedi aidën chiaid niaquec mibi icsaic. ²⁰ —Chuisho tantiabi icquido nëbi tantiabentsëcquidobëdta Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquoio chuibanquid nebi —mibi quepec. ²¹ Adec: —Nuquin Papan chiaid niac-niaquenda —queboedëmbi aidën chiaid mimbi niac-niaquec. —Ampenda —queboedëmbi mimbitsen ampepec. ²² —Utsin chido chudenda —queboedëmbi utsin chido mimbitsen chudpec. Papa quequin matsesbimboecnuc matses utsibon nacnenaid isash: —Nuquin Papa tantienquoio yec nëid nacnenquid icsambo iquec —queboedëmbi aidën nacnenaid tantiate shubun puduedshun mimbi ampepec. ²³ —Nuquin Papan ambi chiaid con tsusedpa Moises dada uamepampid bedshun con matses isadaidbonuidtsëqui Nuquin Papa tantiec —queboedëmbi ambi chiaid niac-niaquec mibi icsamboec tabadec. ²⁴ Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun

matses utsibon: ‘Ambi Nuquin Papa caidtsembien icsambo icchitec,’ capendac,” quequin dada uamepampicpadquiec mibi icsamboec tabadsho isun matses utsibon Nuquin Papa bēdamboen tantienquo iquec.

Nuquin Papa tantiaquidquo icte chiaid

²⁵ —Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuēbo shui dēbid dēteshun secaic. Adonēdaid ambi chiaid niac-niaquenquo yec bēdamboec tabadsho Nuquin Papan bēdamboen istsiash. Isadaidbo utsibon ambi chiaid niac-niacsho Nuquin Papan bēdamboen istiapimbo iquec ambi con matses cacmaidobimboecnuc. ²⁶ Nuquin Papan con matses cainquo icpampido matses utsiboen ambi chiacpadec bēdamboec tabadsho Nuquin Papan bēdamboen istsiash ambi: —Con matses nec —caidobimboecnuc. ²⁷ Adec matses utsibo Nuquin Papan chiacpadec bēdamboec tabadsho isash isadaidbo nader chiacpec. —Matses utsibo bēdamboec tabadnubi Nuquin Papan Moises dada uamepampid isbanisbanshumbi isadaidbon Nuquin Papan chiaid niacniacpec. Isadaidbo matses dadpen icsambo iquec —cadpec. ²⁸ ¿Shui dēbid dēteshun secaquido isadaidbotedi Nuquin Papa tantiaquidomboda nedic? Padenquo. ¿Matses ismēnēn Nuquin Papan chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquo. ²⁹ ¿Ambi Moises dada uamepampiduidi ěmbimbo nanuequid Nuquin Papa tantiaquidquioda nedic? Padenquo. Nuquin Papa tantiaquidquien aton Mayanēn tantiamiacpadec bēdamboec tabadec. Adquid: —Mibi bēdambo iquec. Con matses mibi canu —capec Nuquin Papan matsesēn adoenuo icnubi.

3

Nuquin Papan isadaidbo tantiec, quequin chiaid

¹ Aden: —Abi tantiec bēdamboec tabadquid Nuquin Papan con matses catsiash —quequin ěmbi chuisho tantiash: —¿Isadaidbo yecta icsambo icpec? —¿quecta ique? —Padenquio iquec —caimbi. —¿Ada aido ambi con matses caido Nuquin Papan nashunac? —¿quecta ique? ² Ai, aido nashunquiac. —Ěmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic. ³ Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquien nainquio icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquio icpatsiash? ⁴ Padenquio. Ma ambi chiacpadomboen naquidquio Nuquin Papa neyoc. Muesambo nec. Matses abitedimbo muaquidquio icnuc Nuquin Papain abimbo chuiquidquio nendac. Aden chuiquin Nuquin Papan con tsusedpa dada uamepampic.

“Nuquin Papa abimbo chuiquidquio nec.

‘Nēid bēdambo iquec. Nēid icsambo iquec, quequin Nuquin Papan abimbo chuibanendac, quequin ma matsesēn tantianu,’ quequin

Nuquin Papan: ‘Mibi icsaoc,’ quequin ěbi chuiboed chiombi,”
quequin dada uapampic.

⁵ Ěbi adsho bēdamboen tantiata. Icsamboen tantienda. —Nuquin Papan chiaid niac-niaquec ěbi icsasho isash: “Adquidpenquio Nuquin Papa nec. Icsaisambo nec,” quetsiash con matses. Adec icsaquimbi ěmbi con matses Nuquin Papa bēdambo icte tantiameshobi Nuquin

Papan ëbi cuidac icsambo ictsiash —quequin icsamboen tantienda. ⁶ Matsesën naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bëdambo iquec. Mibi cuidenquo iquembi —quetiapimbo Nuquin Papa iquec. Muesambo nec. ⁷ Nadembidi icsamboen tantienda. —Ëbi muaquidquo icnubi: “Adquidpenquo Nuquin Papa nec. Bëdamboshë iquec. Muesambo nec,” quetsiash con matses. Adec muaquimbi Nuquin Papa muainquo icte con matses tantiametsiambi. Aden ëmbi abi tantiameshobi Nuquin Papan ëbi cuidac icsambo ictsiash —quequin icsamboen tantienda. ⁸ Aden icsamboen chiec nuqui nadtsiac. —Nuquin Papa tantiamenuequi icsaquionona —nuqui quetsiac. ¿Adendambi chuidio? Padenquo. —Pabado chedo: “ ‘Nuquin Papa tantiamenuequi icsaquionona,’ quiosh,” quequin mibi muauaosh —quequin chuituidoshi. Ëbi muauaquido Nuquin Papan cuidchitoshon.

Matses abitedi icsaquido nec, quiaid

⁹ Tanta, con matses. Mibi padpiden chuinu. ¿Atotsibi quo? ¿Ada tantio? ¿Utsibon Nuquin Papan chiaid niacniacnubida nuquiuidi Nuquin Papan chiaid niacniaquesa icpe? Padenquo. Nuquin Papan chiaid niaquesamboen nibëdec. Matses utsibo con matses isadaidbobëd abembi bëdamboec tabadiapimbo iquec. Abitedimbo icsamboec tabadquido nec. Aden mibi chiombi. ¹⁰ Aden chuiquin Nuquin Papan dada uamepampic naden.

“Nuquin Papan chiaid niaquesambo nibëdec.

Abitedimbo icsaquido nec.

¹¹ Nuquin Papa tantiaquin ambi chiacpadomboenuidi naquidquo nibëdec.

Nuquin Papa tantiate bunquidquo nibëdec.

¹² Bēnudshun podqued tantienquoio yac bimboen Nuquin
Papa tantienquoio icquin matses abitedishun ambi
chiaid niac-niaquec.

Adsho isun Nuquin Papan: ‘Abitedimbo icsambo iquec,’
capec.

Ambi chiaid niaquesambo nibēdec.

Abitedimbo icsapēc.

¹³ Nadquoio iquec. Nēid icsamboec chuishumēnquido.
Unēsaid ēnden chococacno shēdec: ‘Pisenac,’ que-
quin tantiac bimboen adquido onquesho tantias: ‘Icsambo
icquido nec,’ quequin matsesēn tantiec.

Nēidic muaquido.

Nēidic nisin pequin icsa uac bimboen icsa uate bunec
icsamboec onquequido.

¹⁴ Nēidic nēishash chieshēmēnec: ‘Unēs chitoshon,’ que-
quin icsamboenuidi chuiquido.

¹⁵ Nēidic intac mēyamec badedquoio cuesunianquido.

¹⁶ Nēidic abēd icquido natiamēc chieshēmēnquido.

¹⁷ Adquidtedi cuesnante bunec bēdamboec
tabadtiapimbo iquec.

¹⁸ ‘Nuquin Papan cuidnushe,’ quenquoio icquid Nuquin
Papa tantiesabo nec,”

quequin dada uamepampic.

¹⁹ Aden ambi: —Abitedi icsambo iquec —quequin chiaid
Nuquin Papan con matses isadaidboba tantiamenuen con
tsusedpa dada uamepampic. Aden dada uamiampid tan-
tiashun: —Icsaquidpenquoio nebi —quequin isadaidbon
Nuquin Papa chuitiapimbo iquec. —Icsaquido abitedi nec
—quequin Nuquin Papan matses utsibo abitedibēdtabi
isadaidbotsen chiac: —Abimbo chiec —quiash dacuēdec
ēcbedanenquoio tabadendac matses abitedi. ²⁰ Aden ambi
chiaid niaquesambo nibēdnuc: —Ambi chiaid niaquesa
icsho Nuquin Papan nuqui bēdamboen isec —quequin

nuqui abimbo chuitiapimbo iquec. Nuquin Papan chiaid isash: —Ambi chiaid niac-niaquec icsamboequien nuqui tabadchitec —quequin nuqui tantiapec.

Nuquin Papa matses bēdamboen ismete chiaid

²¹ Aden ambi chiactedi natiapimbo yec matses icsasho isun Nuquin Papan abi matses bēdamboen ismete chuiquin isadaidbo tsusedpa Moisesbēdta tsusedpabo utsibo dada uamepampic ėndenquimbo. Aden ambi dada uamepampicpadomboen nēbi Nuquin Papan abi matses bēdamboen ismequid matsesmepac caondash.

²² Adoac Nuquin Papa abi tantiaquido bēdamboen ismenuec Esuquidistu abided ciudadec unēspac caondash. Nēbi aidquio tantiaشو Nuquin Papan matses bēdamboen isec. Isadaidbobēdtambi matses utsibontsen Esus tantiaشو adoendac. ²³ Adec matses abitedi Nuquin Papan chiaid niac-niaquec icsaquido yec Nuquin Papapadquid icsaisambo nibēdec. ²⁴ Adquid bēdamboen istiapimbo icquin matses bēdamboen iste bunquin aton Mado Esuquidistu abided unēs uamequin Nuquin Papan cuidpac caondash. Nēbi abided cuidadaid Esus tantiaشو nuqui bēdamboen isec icsaisabimboecnuc. ²⁵ —Icsaido cuidquid icquimbi nuqui cuidenquio icnuen Nuquin Papan nac —nuqui camenuen Nuquin Papan nuqui icsaid bedshumequin Esused unēs uamequin cuidpac caondash. Esus tishabi icnuc Nuquin Papan abi tantiaquido cuidenquio icpampic: —Yuecshun con Madoded cuidendambi —quequin tantiaquin. ²⁶ Nēbi adecbidi: —Icsaido cuidquid nebi —quequimbi Nuquin Papan ambi chiacpadec nuqui icsaid bedshunec abided cuidadaid Esus tantiaشو adem-bidi nuqui bēdamboen isquin cuidenquio iquendac.

²⁷ Ĕmbi aden chuisho tantiaشو: —Ambi chiacpadomboenuidi nasho Nuquin Papan bēdamboen isebe —quequin mimbi abimbo chuitiapimbo iquec. Matsesĕn

Nuquin Papan chiacpadomboenuidi natiapimbo icsho bēdamboen istiapimbo icboedi nēbi Esus tantiasho Nuquin Papan nuqui bēdamboen isec. ²⁸ Aden matsesēn ambembi naquin Nuquin Papa bēdamboen ismetiapimbo iquec. Padnuen utsin: —Matsesash ēbi icsaid bedshunec abided cuidadaid tantiasho Nuquin Papan ēbi bēdamboen isec — quequin Esus tantiasho Nuquin Papan bēdamboen isec. ²⁹ ¿Isadaidboudida Nuquin Papan bēdamboen ispatsiash? Padenquo. Matses utsibo isadaidpembobi Nuquin Papan bēdamboen istsiash. ³⁰ Matses abitedi uaquid icquin ambi chiacpadomboen isadaidbon Esus tantiasho Nuquin Papan bēdamboen isec. Adembidi matses utsibon Esus tantiasho Nuquin Papan bēdamboen isec. ³¹ Adoaido: — Nuquin Papan chiaid niac-niaquec icsamboec tabadnuna —¿quecta icpec? Padenquo. Esus tantiaquido icquin Nuquin Papan chiacpadomboen natiadquo nuqui yanec.

4

Nuquin Papan Abadauan bēdamboen isaid

¹ Tantia. Aden Nuquin Papan bēdamboen iste chuiquin isadaidbo tsusedpa Abadauan caid ēnden icpampidtsen mibi chuinu. ¿Atotsieshun Nuquin Papan Abadauan bēdamboen isbempampic? ² Bēdamboecuidi tabadsho Nuquin Papan bēdamboen isaid yec Abadauan: — Bēdamboecuidi tabadquin Nuquin Papa bēdamboen ismembī —quetsempampic. Abadauan bēdamboecuidi tabadambo. Adsho: —Bēdamboecuidi tabadsho Abadauan bēdamboen isembī —quenquo icpampic Nuquin Papa. ³ Nuquin Papan tantiamiac naden Abadauanēn nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bēdamboen isendambi,’ qeshun Nuquin Papan bēdamboen

isbempampic icsaisabimboecnuc,” quequin chuipampic.

⁴ Matsesien adenquoio iquec. —Ambi chiacpadomboen nasho icbon yua bēdamboen isquid —nuqui quepec.

⁵ Nuquin Papambien nadotsiash. Matses icsaboedi: — Bēdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan bēdamboen isbentsiash icsaisabimboecnuc. ⁶ Adembidi Nuquin Papan tantiamiac ambi bēdamboen iste chuiquin con tsusedpa Dabidēn dada uapampic naden.

⁷ “ ‘Ambi chiaid niac-niacboedēmbi: Bēdambo icquid icquin Nuquin Papan ambi chiacpadomboen naindac,

quequin abi tantiasho Nuquin Papan ēbi bēdamboen isec ēbi icsaid bēpiscudacimboen.

Icsaisabimboecnuc ēbi bēdamboen isquin ēbi cuidenquoio iquendac,’ quiash matses bēdambo yec cuishon-quec.

⁸ ‘Abi tantiaquid icsho isash ēbi icsaid bēpiscudash:

Ēmbi chiaid mimbi niac-niaccoque. Mibi cuidnu, Nuquin Papan ēbi cainquoio iquendac,’ quiash matses bēdambo iquec,”

quequin Dabidēn chuipampic ēndenquimbo.

⁹ ¿Shui dēbid dēteshun secaido isadaidboudida Nuquin Papan bēdamboen ispec? Padenquoio. Matses utsibotsen bēdamboen istsiash. Tantia. Ēmbi chuiboebidi chuioanu. Abi tantiaquid icsho Nuquin Papan Abadauan bēdamboen isbempampic ambi chiaid niacniacacmaidbimboecnuc. ¹⁰ ¿Ambi chiacpadomboen shui dēbid dēteshun secacshoda Nuquin Papan Abadauan bēdamboen isbempampic? Padenquoio. Shui dēbid dēteshun secabi icsho Nuquin Papan Abadauan bēdamboen isbempampic. ¹¹ Bēdamboen isbenshumbic: —Abadauan, ēmbi chiacpadomboen nabenta. “Nuquin Papan bēdamboen

isaido nebi. Aid bëshunchitomane,” queshun min matses-
 tedi shui dëbid dëteshun secabanta —capampic Nuquin
 Papan. Adoac Abadauanën nabempampic. Aden shui
 dëbid dëtiacmaid icquin Abadauanën Nuquin Papa tan-
 tiacpadomboen nëbi shui dëbid dëtiacmaidon Esus tan-
 tiasho Nuquin Papan bëdamboen isendac ambi chiaid
 niac-niacacmaidbimboecnuc. ¹² Abadauanën tsyuec-
 quido isadaidbo Abadauambimboecquido Nuquin Papa
 tantiaquido abi iquec. —Shui dëbid dëtemenëdaid ic-
 sho Nuquin Papan bëdamboen isebe —quenquo icquin
 Nuquin Papabëdta Esus tantiasho isadaidbo Nuquin Pa-
 pan bëdamboen isaido abi iquec.

Nuquin Papan Abadauan chiaid

¹³ Ĕndenquimboshë Nuquin Papan Abadauan naden
 chuipampic. —Abadauan, mibi nibëdanan yuecshun
 min tsyuecquid abentsëcshun utsibo bëdambo icmen-
 dac. Nidaid utsi-utsiec yacno tabadquido adoendac —
 quepampic Nuquin Papa. —Min tsyuecquid abentsëqui
 tantiasho matses bëdamboen isendambi —quequin otac-
 quio tantiaquin Nuquin Papan adopampic. ¿Ambi chi-
 acpadomboenuidi Abadauanën nashoda Nuquin Papan
 aden chuipampic? Padenquo. Nuquin Papan chiac: —
 Ai, abimbo caic —qeshoen Abadauan bëdamboen isben-
 shun Nuquin Papan adopampic. ¹⁴ ¿Nëbi: —Moisesën
 chiaid niaquesa icsho Nuquin Papan bëdamboen isebe
 —quec muaquidoda Nuquin Papan bëdamboen ispadic?
 Padenquo. Adec muaquidobi bëdamboen isquin ambi
 Abadauan chiaid niactsiash. Adotiapimbo icquin ambi
 chiacpadomboen Abadauanën tsyuecquid tantiaquidoen
 bëdamboen isec. ¹⁵ —Moisesën chiaid niaquesambo nebi
 —queboedombi aidën chiaid niac-niacsho isun Nuquin
 Papan cuidendac. Ambi chiaid niaquesambo nibëdec.

Nuquin Papan: —Bëdamboec tabadta —quequin chiaid nibëdnuc ambi aden chiaid matsesën niactiapimbo ictsiash. Ambi: —Bëdamboec tabadta —quequin chiaid abi iquec. Aid niaquesambo nibëdec.

¹⁶ Nuquin Papan naden Abadauan chuipampic. — Abadauan, ëmbi chuisho tantiash: “Mimbi abimbo caic,” qesho mibi bëdamboen isquin min tsyuecquido bëdambo icmendambi —quequin chuipampic. Nëbi ambi chuipampicpadomboen naquin Esus tantiaquido Nuquin Papan bëdamboen isec. Nuquin Papan ambi chiaid dada uamepampidën Moisesën tsyuecquido isadaidbon Esus tantiasho Nuquin Papan bëdamboen isec. Abadauanën Nuquin Papa tantiacpadomboen matses utsibontsen Esus tantiasho adembidi bëdamboen isec. Esus tantiaquidtedishun papabimboecquid Abadauan nec. Ambi Nuquin Papa tantiacpadomboen nuqui tantiec. ¹⁷ Ambi aden Abadauan chiampid chuiquin Nuquin Papan isadaidbo tsusedpa naden dada uamepampic. “Mibi unësan yuectaneshun min tsyuecquido nidaid utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoquien: — Abimbo mimbi caic —quequin Nuquin Papa Abadauanën tantiapampic. —Comapenen tantiaquin unësaid uincumequidquio icquin ambi chiacpadomboen ëbi bacuë tishmendac —quequin Abadauanën Nuquin Papa tantiapampic. Nëbi ambi Nuquin Papa tantiacpadomboen Esus tantiaquido: —Nuquin papabimboecquid Abadauan nec —quepec.

¹⁸ Nuquin Papan: —Min tsyuecquido dadpenquio iquendac —cac: —¿Mitsipadoac aidtedi con tsyuecquido icpec? Ma con bacuëbo nibëdpayoc. Tsusiombo icquin bacuë tishmetiapimbo iquebi —queuidboedi Abadauan nadpampic. —Ai, abimbo mimbi caic —quepampic aton

mado nibëdnubi. Adshun tsusioctsëcquio icquimbi aton mado tishmepampic. Nëbi aton tsyuecquido dadpenquio iquec Nuquin Papan chiampicpadequi. ¹⁹ —Con seta dadpenquio 100tedi icnuc tsusiobudtsëcshun ëmbimbo bacuë tishmetiapimbo iquebi. Con chido ëndenquio machobudtsëccondaid icquin bacuë usundotiapietsëcquio iquec —quequin tantiequi: —Nuquin Papan abimboen caosh —quepampic. ²⁰⁻²¹ —Nuquin Papa mue nec —quenquio yec: —Nadatiambo icquid icquin ambi chiacpadomboen Nuquin Papan naic —qeshun Nuquin Papa tantiatsëcboedëmbi aid tantiaquiopampic. Adshun: —Mibi bëdamboshë iquec, Papa —quequin Nuquin Papa chuipampic. ²² Adsho tantiashun Nuquin Papan bëdamboen isbempampic icsaisabimboecnuc.

²³ Aden Nuquin Papan ambi Abadauan bëdamboen isaid isadaidbo tsusedpa dada uamepampic. ¿Abadauanën naiduidi tantiamenuenda aden dada uamepampic? ²⁴ Padenquio. Nuquitsen Nuquin Papan ambi bëdamboen iste tantiamenuen aden dada uamepampic. Nuquin Icbo Esusbëdta abi uincuemequid Nuquin Papa tantiasho nuquitsen bëdamboen isec. ²⁵ Nuquin Papan tantiacpadec nuqui cuidmenquio icnuec nuqui icsaid bedshunec abided cuidadec Esus unëspanëdash. Aden Nuquin Papa abi tantiaquido bëdamboen ismenuec unësash uincuempanëdash Esus.

5

Esus tantiaquido Nuquin Papan bëdamboen isaid

¹ Aden Esus tantiasho Nuquin Papan bëdamboen isaïdo yec abi cuidte dacuëdënenquio yec abëdi nuqui bëdamboec tantiananec. ² Ëmbi chuibocpaden abi tantiaquido nuqui cuidmenquio icnuec abided unësquin Esusën Nuquin Papa nuqui bëdamboen ismepec. Adoac

nuqui nadpec. —Nuqui bēdamboen isquin unēsacsho nuqui abipadquid icsaisa icmequin Nuquin Papan abēdi nuqui tabadmendac —quec nuqui cuishonquec. ³ Nadectsen nuqui cuishonquec. —Esus tantiaquid icsho utsibon chieshēnaqui Esus tantiatsēchoedi chieshtoenquio icquin Esus tantiaquidquio yanebi —quectsen nuqui cuishonquec. ⁴ Aden chieshtoenquio icquin Esus tantiasho Nuquin Papan nuqui bēdambo capec. Adoac: —Esus tantiaquid icsho Nuquin Papan ēbi bēdambo icmec. Unēsacsho abi yacno ēbi tabadmendac ambi chiacpadamboen —quepec nuqui. ⁵ Adec: —Abi yacno ēbi tabadmendac —quequin Esus tantiaquid ¿ada Nuquin Papan cacumepec? Padenquio. Aton Mayan nuquibēd icmiac paposhquiacbimboen nuqui naden tantiec. —Nuquin Papan ēbi bēdamboen tantiaquin abi yacno ēbi puduedmendac —quequin nuqui tantiec.

⁶ Aden matses tantiaquiec Nuquin Papan tantiacpadec Esus nadpanēdash. Matses abitedi abembi bēdamboec tabadtiapimbo icsho isun Nuquin Papan uesquin cuidtsenubi abi tantiaquido cuidmenquio icnuec abided cuidadec Esus unēsapanēdash. ⁷ ¿Ada adquid matses icpadic? Padenquio. ¿Cuesanquidēn matses bēdambo icquid caic: —Cuesnu —quesho tantiashunda dadpenshun: —Aid cuesenda. Ēbiquien cuesta —capatsiash? Padenquio. Bēdamboshē icquid cuesmenquio icnuen: —Nēid cuesenda. Ēbiquien cuesta —cachitembien ictsiash abentsēcshun. Icsambo icquid icshoen aden chienquio ictsiash. ⁸ Padnuen matses abitedi icsamboecuidi tabadnuc nuqui cuidmenquio icnuec Esuquidistu abided cuidadec unēsapanēdash. —Nuquin Papan ēbi tantiaquiec —matses camenuen Nuquin Papan aden Esus namepanēdash.

⁹ Nēbi abided cuidadaidquio Esus tantiasho Nuquin

Papan nuqui bēdamboen isec icsaisabimboecnuc. Aden bēdamboen isquin Nuquin Papan nuqui cuidtiapimbo iquendac. ¹⁰ Matsesēn abi chieshēnsho isun aido cuidte bunenquio icquin Nuquin Papan aton Madoded cuidpanēdash. Aden aton Madoded cuidash nēish bēdanshun Nuquin Papan aton Mado tantiaquid bēdamboen isec. Nēbi Nuquin Papan uincuemenēdaid icquin Esusēn nuqui bēdamboen tabadmec. ¹¹ Adembidi aidēn tantiamiacpadomboen nuqui: —Ēbi cuidenquio icnuen aton Madoded cuidquid bēdamboshē iquec —quequin Nuquin Papa tantiec nuqui cuishonquec.

Adanēn naidbēdta Esusēn naid chiaid

¹² Nuqui bēdamboen ismequid Esus tishabi icnuc abia matses uaidēn Adanēmba Nuquin Papan chiaid niacniaquec icsasho cuidquin aidba Nuquin Papan unēsquid icmepampic. Adembidi Adanēn tsyuecquido matses abitedi Adan icsacpadecebidi icsate tantiaquimbi Nuquin Papan unēsquidoudiquio matses icmepampic. ¹³ Nuquin Papan: —Adec icsainda —quequin ambi chiaid Moises dada uamiabi icnubi matses abitedi icsapampic. —Ēmbi Moises chuimiaid mimbi niac-niaquec —Nuquin Papa quetiapimbo icnubi matses icsapampic. ¹⁴ Nuquin Papan chuiboedquiobi niaquec Adamba icsasho Nuquin Papan cuidac unēsec taēpampic. Adan unēsambic aidēn nacpadomboen nabi icsa utsi naiqui matses abitedi icsasho adembidi unēsquidoudiquio Nuquin Papan icmepampic. —Naden nata —quequin Moises dada uamequin Nuquin Papan chiabi icnubi aidēn chiaid niactiapimbo yec utsi naic icsashobi adopampic. Ambia Nuquin Papan chiaid niacampid Adampadquidpenquio Esuquidistu nec.

¹⁵ Matses abentsēcshun Adanēmba Nuquin Papan chiaid niacsasho cuidquin aidba unēsquid icmeshun aton tsyuecquido matses unēsquidoudiquio Nuquin Papan

icmepampic. Adecbidi Nuquin Papa matses bēdamboen ismequid abentsēc iquec. Esusuidtsēqui abi tantiaquidotedi cuidmenquo icnuec abided ciudadec unēs-pac caondash. Nēbi aid tantiasho Nuquin Papan nuqui bēdamboen isec. ¹⁶ Adanēn nacbimboen Nuquin Papa matses bēdamboen ismequidēn nambo. Adan abentsēqui icsaquin Nuquin Papa cuidmiac abi unēsacpadquiec matses abitedi unēsquidombo yanac. Nuquin Papa bēdamboen ismequidēmbien matses icsaid bedshunec abided ciudadquin Nuquin Papa abi tantiaquidotedi bēdamboen ismec icsaisabimboecnuc. ¹⁷ Ambi chuiboedi niacquin Adanēn Nuquin Papa cuidmiash unēsquid yanac-padec matses unēsquidoudiquio iquec. Esuquidistunuidtsēqui nac Nuquin Papan matses bēdamboen isendac. Nēbi aid tantiasho Nuquin Papan nuqui bēdamboen isquin bēdamboec tabadquid icmendac. Adec bēdamboec tabadec unēsash Esusbēdtan Nuquin Papan namiacno bēdam-boshē yacnombo nuqui tabadendac.

¹⁸ Adec matses abentsēqui icsasho aidbēdta aton tsyuecquido matses abitedimbo cuidquin Nuquin Papan unēsquidoudiquio icmepampic. Padnuen Nuquin Papan chiacpadec abentsēqui abided ciudadaidēn Nuquin Papa abi tantiaquido bēdamboen ismequin Nuquin Papa yacno tabadmendac. ¹⁹ Nuquin Papan chiaid niac-niaquec Adan icsaic taēambic aton tsyuecquido abitedimbo icsaquidoudiquio yanac. Padnuen Nuquin Papan chiaid ni-aquesambo icquin Esusēn Nuquin Papa nuqui bēdamboen ismec. ²⁰ ¿Matses bēdamboen isnuenda Nuquin Papan ambi: —Bēdamboec tabadta —quequin chiaid Moises dada uamepampic? Padenquo. Matses abi icsaid tantiamenuen ambi chiaid Moises dada uamepampic. Aden chiaid chuisho tantiash: —Icsaobi —quequin tantiaquin abided ciudadaid tantiasho Nuquin Papan mat-

ses bēdamboen isec. ²¹ Taëec matses icsasho cuidac unēsquidoidquio yanac. Adsho isun matses bēdamboen isnuen Nuquin Papan ambi chiaid niaquesambo Esused cuidac. Nēbi Nuquin Icbo Esuquidistu tantiasho Nuquin Papan nuqui bēdamboen isec icsaisabimboecnuc. Nuqui unēsacsho abēdi tabadmendac padpidec unēstiapimbo icnuc.

6

Esus tantiaquid bēdamboec tabadquid, quiaid

¹ Nuquin Papan bēdamboen iste ěmbi chuisho tantiashun naden tantienda. —Icsaido cuidmenquio icnuec abided Esus ciudadec unēsapanēdash. Aid tantiasho Nuquin Papan bēdamboen isquin nuqui cuidtiapimbo iqueque. Aden bēdamboen isaqui icsaquionona —quequin tantienda. ² Esus tantiaquido adesambo nec. Esus tantiec icsateuidi nuqui bunenquio yanec. ³ ¿Tantienquioda ique? Naden chuiquin mimbi acten mentomiac. —Ĕbi cuidmenquio icnuec abided ciudadec unēsaid Esus tantiaquid nebique. Ambi chiacpadecec tabadtiadquio iquebique. Utsibo ismenu —quequin mimbi acten mentomiac. Adec Esus unēsaid tantiequi icsaboedobi icsate bunenquio nuqui yanec. ⁴ Aden Esus abided ciudadec unēsaid tantiasho Nuquin Papan utsiacbimboecnuc nuqui icmec. Esus unēsacsho comapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan utsiacbimboecnuc nuqui icmec. Adoac icsateuidi bumboedobi adte bunenquio yanec Nuquin Papan chiacpadequi nuqui bēdamboec tabadcuenece.

⁵ Adec abided ciudadec unēsaid tantiec icsate bunenquio yanquid yec Esus uincuemiabimboen comapenen tantiaquin Nuquin Papan utsiacbimboecnuc icmiaidtsen

nuqui nec. ⁶⁻⁷ Esus tantiabi yec icsaquido icboedi matts icsaid bedshunec Esus unësaid tantiec nuqui icsate bunenquio yanec. Mëtaniaid abibi mënchiquidtiapimbo yac bimboec matts abembi icsaic ënëdtiapimbo iquec. Adboedi Esus tantiec nuqui icsate bunenquio yanec.

⁸ Adec Esus unësaid tantiec icsainquio yanec nuqui nadpec. —Nuquin Papan uincuemiaidën Esusën nuqui bëdamboen tabadmec. Unësacsho Nuquin Papa yacno abëdi nuqui tabadmendac —nuqui quepec. ⁹ Nuquin Papan uincuemiatic Esus padpidec unëstiapimbo iquendac. Aton dada unësquid icboedi unëstiapimbo icquid yanac. ¹⁰ Matts icsaido cuidmenquio icnuec abided abentsequi ciudadec Esus unësac caondash padpidec unësenquio yec. Adsho uincuemiatic Nuquin Papan chiacpadomboen nabanec aidbëd tëshnanenquio yec tabadec.

¹¹ Èbi adsho tantiash nadta. —Èbi cuidmenquio icnuec abided ciudadec unësacsho uincuemiaid Esus ëbëdi iquec. Aid tantiec icsainquio yanebi. Ambi nacpadec tabadtiadquio iquebi —queta. ¹² Icsamboec tabadenquio icnuna. Nuqui icsate bunaid nainquio icnuna. ¹³ —Icsaquionona —quesho tantiash: —Padi —quenuna. Unësac bimboen Nuquin Papa tantienquio ictenedëmbi uincuenac bimboen Nuquin Papa nuqui tantiabenondaque. Ambi chiacpadec bëdamboequien tabadtiad. ¹⁴ —Nuquin Papan ambi: “Bëdamboec tabadta,” quequin chiaid Moises dada uamiactedi naquin ëmbimbo Nuquin Papa bëdamboen ismembi —quenquio icquin Esus tantiasho Nuquin Papan nuqui bëdamboen isec. Ambi bëdamboen isaido yec nuqui icsate bunenquio nuqui yaneque. Bëdamboec tabadnuna.

¿Tsuntsin yuabo Esus tantiaquido icpec? quequin chiaid

¹⁵ —Aden Nuquin Papan nuqui bëdamboen isec —quequin ëmbi chuisho tantiashun naden icsamboen

tantienda. —Nëbi abided cuidadaid Esus tantiasho ëbi bëdamboen isec. Ëbi cuidtiapimbo iqueque. Ambi chiaid niac-niaquec icsabudquionona —quequin tantienda. Esus tantiaquid adesambo nec. ¹⁶ ¿Tantienquioda ique? Icbon chiacpadomboen yuan naquid. Icsamequidën tantiacpadomboen icsamboen naquid aton yua nendac. Aidën yua icquin icsaid ëntiapimbo yec unësash icsano nidendac. Nuquin Papan yuain ambi chiacpadecec bëdamboec tabadcuendac. ¹⁷ Mibi adec tabadsho isun: —Esus chuibanac icsaid ëntiapimbo icboedi Esus tantiabensash Doma yacnocquido bëdamboec tabadcuendac. Aden namec mibi bëdambo iquec, Papa —quequin Nuquin Papa chiombi. ¹⁸ Satanasën yua icquin mimbimbo mibi icsaid ëntiapimbo icsho Nuquin Papan nac ambi chiacpadquiec mibi bëdamboec tabadcuendac.

¹⁹ —Matses icquin: “Nuquin Papan chiaid tantiadenquio iquec,” canushe —quequin bëdamboen tantiamenuen mimbi tantiaid yuan naid mibi chiombi. Satanasën yua yec icsateuidi bunquiec mibi icsaded-icsadedondac. Adec icsamboshë iccondaidi nëbi Nuquin Papan chiacpadequien bëdamboec tabadtiad. ²⁰ Satanasën yua yec icsaquiec Nuquin Papan chiacpadece bëdamboec tabadtiapimbo mibi iccondac. ²¹ ¿Ada bëdamboec tabadonda? Ma mibi chieshëmënquiec tabadteneyoc. —Ëbi chieshëmënquiec tabadondaid tantiashun: “Mibi icsambo iquec,” ëbi canushe —queshun mimbi naondaid ma mimbi chienquio iccondac. Icsaid ënabi yec unësash icsano mibi nidtsenac. Adecbidi icsaid ënenquio icquido unësash icsano nidendac. ²² Nëbi nuqui Esus tantiasho Nuquin Papan aton yuabo nuqui icmiac. Adoac icsaid ëntiapimbo icboedi nëbi nuqui bëdamboec tabadcuenece. Adquid unësacsho Nuquin Papan abëdi tabadmendac. ²³ Icsaido cuidquin Nuquin Papan icsano

nidmendac. Abided cuidadec unësaid Esuquidistu Nuquin Icho tantiasho Nuquin Papan nuqui bëdamboen isquin unësacsho abëdi tabadmendac.

7

Bëdamboec tabadte chuinuen chido bënëchoquid Pabadon chiaid

¹ Con utsibobimboecquido mibi neque. Tantia. Paden piden mibi chuinu. Naden chiaid mimbi tantianëdac. — Nuquin Papan dada uamiac Moisesën chiampicpadomboen matsesën naquid. Unësun aidën chiaid natiapimboiquec —quequin mimbi tantianëdac. ² Nuquin Papan chiacpadomboen inaidën aton bënë nianesa. Dada utsi chudmesa chidon. Bënë unësambien niante dada utsin bedadquid. ³ Bënë unësabi icnubi aton bënë nianquin dada utsi bedanec cuenacsho: —Icsambo iquec. Nuquin Papan cuidtequid nec —cabededtsiash. Bënë unësambien dada utsin bedadquid chido. Aden bedacsho Nuquin Papan: —Mibi cuidnu —cainquio ictsias.

⁴ Adecbidi ambi chiaid niac-niacsho Nuquin Papan cuidtsenaido nuqui iccondac. Adondaidd abided cuidadec unësaid Esus tantiasho Nuquin Papan: —Mibi cuidnu —nuqui cainquio iquendac. Aden Nuquin Papan uincue-menëdaidd Esusën aton yua nuqui icmequin bëdamboec tabadquid icmenuen nuqui icsaid bedshumpanëdash. ⁵ Esus tantiabi yec nuqui bunacpadecuidi nuqui ic-sapadenec. —Adenda —quequin Nuquin Papan chiaid tantiashi: —Adequi icsaquionona —quiash nuqui icsaquiodenec. Adquid yec unësacsho icsano nidmequin Nuquin Papan nuqui cuidtsenëdash. ⁶ Esus tantiabi yec nuqui nadondac. —Moisesën chiacpadec bëdamboec tabadsho Nuquin Papan nuqui bëdamboen istsias. Ambi chiaid niac-niacsho nuqui cuidendac —quiondaidd nëbi

Esus tantiec nuqui adenquo iquec. Nēbi Nuquin Papan Mayanēn tantiamiacpadec nuqui bēdamboec tabadec.

Icsaquid nebi, quequin Pabadon chiaid

⁷ —Nuquin Papan ambi chiaid Moises dada uamepampid icsambo iquec —¿quectabi ique? Icsapenquo iquec. Nuquin Papan ambi chiaid Moises dada uamiaid isun: —Nuquin Papan chiaid niac-niaquec icsachitobi —quequin nuqui tantiec. “Utsin na isash: ‘Con na adquid nibēdec,’ quec chieshēmēnenda,” quequin Nuquin Papan Moises dada uamiaid isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin tantienquiemi ictsenchitondac. ⁸ Utsin na isash: —Adquid con na nibēdec —quiash chieshēmēntsēchoedi Nuquin Papan: —Adenda —quequin chiaid tantiashi icsaquid yec utsin na comapenec bunquiec chieshēmēnquiondabi. Nuquin Papan chiaid nibēdnuc: —Adec icsachitobi —quequin tantienquo ictsenondambi. ⁹ Nuquin Papan chiaid tantiabi yec Nuquin Papan cuidte dacuēdēnenquo yec: —Bēdambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi. ¹⁰ Adquid Nuquin Papan cuidendac —nuqui quianondac. —Ma bēdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bēdamboec tabadenquo iccobi. Icsachitobi. Adquid Nuquin Papan cuidendac —nuqui quianondac. ¹¹ —Ambi chiacpadomboenuidi nashobini Nuquin Papan bēdamboen isec —quec muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac. ¹² Aden nuqui abimbo

tantiamequid Nuquin Papan chiaid bēdambo iquec. Icsaisambo icquin Nuquin Papan bēdamboen chuipampic.

¹³ ¿Nuquin Papan chiaid isbanashta matses Nuquin Papan cuidtequido yanactic? Padenquoio. Matses Nuquin Papan cuidtequido yanambic Nuquin Papan ambi chiaid dada uamepampic. —Nēid isash: “Icsamboequini tabadchitec,” ma matses quenu —queshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchitec. Nuquin Papan nuqui bēdamboen istiapimboen icchitec. Ēbien cuidchitec —nuqui quianondac. ¹⁴ Nuquin Papan Mayanēn tantiamiacpadomboen con tsusedpan Nuquin Papan chiaid dada uapampic. Adembidi aton Mayanēn namiac Nuquin Papan chiacpadec nuqui bēdamboec tabadtsiac. Aidēn namiabi mētaniaid abibi mēnchiquidtiapimbo yacbimboen icsaquido icquin Nuquin Papan chiacpadomboen natiapimbo nuqui iquec. ¹⁵ —Nuquin Papan chiacpadomboen nanu —queboedombi natiapimbo nuqui iquec. Adecbidi: —Utsibo icsacpadec icsainquoio iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui. ¹⁶ —Nuquin Papan chiaid bēdamboen icchitec. Aidēn chiaid niacte bunenquoio iquebi —queboedēmbi aidēn chiaid niac-niaquec: —Bēdamboen chiaidimbi niac-niacchitec —quebi. ¹⁷ Bēdamboecuidi tabadtiadquidini icsaquid yec ēbembimbi icsadenechitec. ¹⁸ —Bēdamboec tabadnu —queboedi icsaquid yec ēbembimbi bēdamboec tabadtiapimbo iquebi. Icsaquidini nec. ¹⁹ —Bēdambo icte bunebi —queboedi ēbembimbi bēdamboec tabadtiapimbo iquebi. —Icsate bunenquoio iquebi —queboedi ēbenquiobi icsaded-icsadedebi. ²⁰ Icsate bunenquoio icboedi icsaquid yec ēbembimbi bēdamboec tabadtiapimbo iquebi.

²¹ —Adquid nebi. Nuquin Papan chiacpadec bēdamboec tabadtiaquidi badedquio icsaded-icsadedebi —quequin tantiemi. ²² —Nuquin Papan chiaid bēdambo iqueque. Ambi chiacpadec ēbemi bēdamboec tabadnu —queboedi ²³ icsaquid yec ēbemi bēdamboec tabadtiapimbo iquebi. Mētaniaid abemi mēnchiquidtiapimbo yacimboen ēmbi naid ēntiapimbo iquebi. —Nuquin Papan chiacpadec bēdamboec tabadnu —queboedi bēdamboec tabadtiapimboeni icchitec. ²⁴⁻²⁵ Adquid yec shubitiadquio icchitebi. Icsaquid yec: —¿Mitsipadequini bēdamboec tabadpeba? —queboedi: —Abi tantiasho Esuquidistumbini bēdamboen tabadmec —quianondabi. Adshun Nuquin Papa naden chiemi. —Ēbi bēdamboen tabadmequid Esus mimi ēbi tantiamiac. Mibi bēdambo iquec, Papa —quequin Nuquin Papa chiemi.

8

Nuquin Papan Mayanēn namiaid

¹ Aden matses bēdamboen tabadmequid Esuquidistu tantiasho: —Mibi icsambo iqueque. Cuidnu —cainquio iquendac Nuquin Papan. ² Icsaquido yec bēdamboec tabadtiapimbo icsho Nuquin Papan cuidtequido icboedēmbi Esus tantiasho Nuquin Papan aton Mayan meniac aidēn tantiamiacpadec nuqui bēdamboec tabadanendac. ³ —Moisesēn chiacpadec bēdamboec tabadec unēsash Nuquin Papa yacno tabadebi —queboedi icsaquido yec abemi bēdamboec tabadtiapimbo matses iquec. Adsho isun matses bēdamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unēspaneḏash. ⁴ —Abided cuidadaid con Mado Esus tantiasho bēdamboen isquin con Mayan matses menendambi. Adoac aidēn tantiamiac ēmbi

Moises chuimiampicpadec bēdamboec tabadendac. Matses abi icsate bunacpadec icsainquo yec bēdamboec tabadendac —qeshun Nuquin Papan Esusedd cuidpac caondash.

⁵ Adec Nuquin Papan Mayanēn tantiamiaid Esus tantiaquid Nuquin Papan tantiacpadec bēdamboec tabadte bunec. Padnuen icsaquid: —Ēbi bunaid nanu —quequin ambibi tantiacpadec icsaic. ⁶ Aden abi bunaidquo naic icsamboec tabadquid Nuquin Papan cuidendac. Padnuen Nuquin Papan Mayanēn tantiamiacpadec tabadquid Nuquin Papan cuidte dacuēdēnenquo yec bēdambo yec unēsash Nuquin Papa yacno tabadendac. ⁷ —Icsate bunquidēn ēbi chieshēnec. Ambi naiduidtsēqui naquin ēmbi chiacpadomboen natiapimbo iquec —qeshun Nuquin Papan cuidendac. ⁸ Adquido chuiquin: —Mibi bēdambo iquec —catiapimbo Nuquin Papa iquec.

⁹ Esus tantiaquidien adesa nec. Esus tantiasho Nuquin Papan aton Mayan nuqui meniac aidēn tantiamiacpadec nuqui bēdamboec tabadendac. Nuquin Papan aton Mayan meniacmaid Esus tantiesa nec. Nuquin Papan Mayan Esusēn Mayambidi nec. ¹⁰ Abided cuidadaid Esus tantiasho bēdamboen isquin Nuquin Papan aton Mayan meniaid yec abēd tabadtequido nuqui nec. Icsaquido yec matses abitedi unēsquidombo icnubi Esus tantiaquid unēsacsho Nuquin Papan abēdi tabadmendac. ¹¹ Esus uincuemequidēn Nuquin Papan ambi aton Mayan meniaido unēsacsho nuqui uincuemequin nuquin dada utsi uaindac. Aton Mayan nuquibēd tabadsho isun nuqui adoendac.

¹² ĴĒbi adsho tantiashta Esus tantiaquid abi bunacpadequi icsapec? Padenquo. Bēdamboec tabadte bunec. ¹³ Utsiboen abi bunacpadec icsamboecuidi tabadec unēsacsho cuidquin Nuquin Papan icsano nidmendac. Nuquin Papan Mayanēn tantiamiacpadec

tabadquin nuqui icsaid nuqui ënec. Adash unësash Nuquin Papa yacno nuqui tabadendac.

¹⁴ Aden aton Mayanën bēdamboec tabadmiaido Nuquin Papan: —Con mado nec. Con champi nec —capendac.

¹⁵ ¿Icbo icsambo icquidën yua dacuēdmiac bimboenda Nuquin Papan Mayanën nuqui dacuēdmec? Padenquio. Nuqui bēdambo icmec. Aidën tantiamiac padomboen Nuquin Papauidtsēqui papa nuqui capec. ¹⁶ Aden Nuquin Papan Mayanën: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec. ¹⁷ —Con mado nec. Con champi nec —queshun nēbi Nuquin Papan nuqui bēdamboen isquin unēsacsho abēdi tabadmequin nuqui bēdamboshē icmendac. Utsibon chieshēnac chieshtoenquo yec unēsacsho Nuquin Papan abēdi tabadmequin Esus bēdamboshē icmiac. Adembidi Esus tantiaquid icsho utsibon chieshēnaqui chieshtoenquo icquin Esus tantiequi unēsacsho Nuquin Papan abēdi tabadmequin nuqui bēdamboshē icmendac. Nuquin Papa yacnombo Esuquidistun natedi nuquin na nendac.

Nuquin Papan bēdamboshē icmete chiaid

¹⁸ Adec Nuquin Papa yacno nuqui bēdamboshē icte tantiaquin nuqui nidaidën natiaic tabadaiduidi ma nuqui tantiatiapimbo iqueyoc. ¹⁹ Aden Nuquin Papan nuqui bēdamboshē icmete tantiec ambi uaid utsitedi nidaidën icquidtedi aben icquidtedi: —Nēbimbobi bēdambo icmepashuni —queded-quededec tabadec.

²⁰ Abia matses uaid Adan icsasho cuidquin ambi uaid nidaidën icquidtedi Nuquin Papan unēsquiduidquo icmepampic aidon: —Padi —catiapimbo icnuc. ²¹ —Yuecshun ëmbi Esus tantiaquido uincuemequin aton dada utsi uacpadën ëmbi uaido utsi nidaidën icquidtedi

chodquete icboedi utsi uain bēdambošhē icmendambi —quequin tantiaquimbi unēsquiduidquo icmepampic. Aden Nuquin Papan chiaid tantiaquin ambi uaidon nidaidēn icquidtedishun aton dada abi bēdambo icmete tantiaquin cainec tabadec. ²² Unēstiapimbo icte bunec unēsquid yec: —¿Tedectsicshun Nuquin Papan nuqui utsi uapeba? Nēbimbobi Nuquin Papan utsi uapashuni —queded-quededec Nuquin Papan uaidtedi. Bacuē tishquid bacuē paēmbo icnuc: —Badedquo tishmepashuni —quiacbimboec adpec. ²³ Nuquin Papan meniaidēn aton Mayanēn tantiamiacpaden nuquitsen naden chiec. —Con dada utsi uaquin unēstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaquin Nuquin Papan unēstiapimbo icquid icmendac —queded-quededquin nuquin dada utsi uate tantiaquin nuqui cainec. ²⁴⁻²⁵ —Esus tantiaquido unēsacsho Nuquin Papan nuquin dada utsi uaindac —quequin tantiaquin nuqui Esus tantiabenondac. Nuquin dada utsi uabi icnubi: —Nēbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquo iquendac.

²⁶ —Aden aton dada utsi uate tantiaquin yuen cainec chieshtonoshe —queshun Nuquin Papan Mayanēn nuquibēd icquin bēdamboen tantiamec. —¿Mitsipadembimbi Nuquin Papa chuipeba? —quec nuqui shubitiadquo icsho isun Nuquin Papan Mayanēn abi chiec. Unēsquo icnuc onquenquo icquin chiec: —Mimbi tantiacpadomboen aid matses bēdambo icmeta, Papa —quequin Nuquin Papan Mayanēn nuqui comapenen chuided-chuidedec. ²⁷ Aden Nuquin Papan: —Ma Esus tantiaquido bēdambo icnu —quequin tantiaidbidi aton Mayanēn onquenquo icquin chuisho Nuquin Papan

tantiec. Otacquo tantiaidtedi tantiaquid icquin Nuquin Papan aden aton Mayanën chiaid tantiec.

Nuquin Papan nuqui bēdambo icmiaid

²⁸ Aden tantiashun nuqui naden tantiec. Ambi tanti-amiacpadomboen abi tantiaquido bēdambo icmete bunquin Nuquin Papan bēdamboen nashunec. Unēsquo yec tabadsho aden naic. Natiambo icsho adembidi naic. Cuis-honquesho adembidi naic. ²⁹ Ēndenquimboshē nidaid uabi yequi Nuquin Papa nadpampic. —Ēmbi tantiactedi ēbēdta con Mado tantiaquid icmequin Esuspadquo icnuc bēdambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquo icnuc bēdambo icmenuen Nuquin Papan naic. ³⁰ Ēndenquimboshē nidaid uabi yec: —Yuecshun naindami —abi quiampicpadomboen Nuquin Papan nuqui Esus tantiamiac. Adoac nuqui cuidmenquo icnuec abided cuidadaid Esus tantiasho Nuquin Papan nuqui bēdamboen isec isaisabimboecnuc. Nuqui bēdamboen isquin nuqui bēdamboen tabadmec. Unēsacsho nuqui unēstiapimbo icquid icmeshun abēdi tabadmendac.

³¹ ¿Embi aden chiaidtedi tantiashta Esus tantiaquido dacuēdpec? —Nuqui cudasquin Nuquin Papan nuqui bēdambo icmendac. Ēbi chieshēnquidën: “Cuid,” cac Nuquin Papan ēbi cuidenquo ictsiash —quec nuqui dacuēdenquo iquec. ³² Nuquin Papan nuqui tantiaquiec. Aton Madombo cudasenquo icquimbi nuqui cuidenquo icnuen aton Madoded cuidquin unēs uamepanēdash. Adshumbic Esus tantiasho ēnenquo icquin bēdamboen isquin nēbi bēdambo icmequin unēsacsho abēdi tabadmequin nuqui bēdamboshē icmendac. ³³ ¿Nuquin Papan nuqui bēdamboen isquidēmbida nuqui cuidpec?

Padenquio. ¿Utsibo nuqui caic: —Icsambo iquec —queshobida Nuquin Papan nuqui cuidpec? Padenquio. ³⁴ ¿Esusëmbida nuqui cuidpec? Abi tantiaquido cuidmenquio icnuec abided ciudadec Esus unësac caondash. Unësacsho Nuquin Papan uincuemiac Nuquin Papa yacnoshon aidëmbi abi tantiaquido chianec. —Ëbi tantiaquido bëdamboen isquin cuidenda, Papa —quequin Nuquin Papa chianec tabadec. ¿Adquidënquiobida nuqui icsano nidmequin cuidpec? Padenquio. ³⁵ Nuqui bëdamboen isquin ënenquio icquin Esusën nuqui tantiaquieci. ¿Shubisho isunda Esusën nuqui tantienquio icpec? Padenquio. ¿Dacuëdshoda Esusën nuqui tantienquio icpec? Padenquio. Adembidi nuqui tantiaquieci. Utsibon chieshënsho bëdamboen isquinc pete natia bunsho bëdamboen isquinc nuquin dashcute nibëdsho bëdamboen isquinc nuqui Esusën caindac. —Ëbi acshunendac —quesho bëdamboen isquinc chieshëmënquidon: —Cuesunenu —casha bëdamboen isquinc nuqui caindac Esusën ënenquio icquin. ³⁶ Aden utsibon Esus tantiaquido chieshënte chuiquin Nuquin Papan dada uamepampic naden.

“Mibi tantiasho ëbi: ‘Cuesunenu,’ caded-cadedec uimanëmënquidon.

Aben icquidbimboecnuc: ‘Cuesunenu,’ caded-cadedebi, Papa,”

quequin Nuquin Papan chiaid dada uapampic Esus tishabi icnuc.

³⁷ Aden utsibon nuqui chieshënsho Esuquidistun nuqui bëdamboen tantiaquieci. Shubisho abi nuqui tantiamec. Adoac Esus tantiatsec shubiquimbi chieshtoenquio icquin nuqui Esus tantiaquieci yanendac. ³⁸⁻³⁹ Nuquin Papantsen ënenquio icquin nuqui tantiaquieci. Nuquin Ibo Esus tantiasho Nuquin Papan nuqui bëdamboen isec. Unësacsho

nuqui bēdamboen tantiatsiash. Unēsabi icsho nuqui bēdamboen isec. ¿Nuquin Papan abi yacnoshon uaid mayan bēdan: —Aid tantienda —cashoda nuqui Nuquin Papan tantienquo yampatsiash? Padenquo. Adembidi nuqui tantiaquiotsiash. ¿Podobitsi icsabon icbo Satanasēn: —Aid tantienda —cacta Nuquin Papan nuqui chieshēmpatsiash? Padenquo. Adembidi nuqui tantiaquiotsiash. Nēbi nuqui bēdamboen tantiec. Yuecshun adembidi nuqui bēdamboen tantiendac. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquiotsiash. Abuc nidacsho Nuquin Papan nuqui bēdamboen tantiatsiash. Nidaid uquēducquo nidacsho adembidi nuqui bēdamboen tantiatsiash. Nuquin Papan uaid utsi abitedishun nuqui caic: —Aid tantienda —caqui adembidi Nuquin Papan nuqui bēdamboen tantiatsiash ēnenquo icquin.

9

Pabadon aton matses isadaidbo chiaid

¹⁻² Aden con matses isadaidbo tantiaquid Nuquin Papanec. —Aden abi tantiaquidi con matsesēn bēdamboen tantienquo iquec —quiash shubitiadquo iquebi. Muainquo iquebi. Esus tantiaquid icsho Nuquin Papan Mayanēn tantiamiaid icquin abimbo chiembique. Tantiata. ³ Con matses isadaidbo tantiec unēsquo yec tsadebi. Nuquin Papan: —Min matses abitedi cuidenquo icnuen mibiuidtsēqui Esusbēd tabadmenquo icquin icsano nidmequin cuidnu —capatecnēdani. Adoac: —Ai, con matses cuidenquo icnuen ēbided cuid —quetsenondabi. ⁴ Con matses tsusedpa Acobo caid Nuquin Papan Isadaid caidēn tsyuecquidotedi isadaidbo tantiaquin Nuquin Papan nadopampic. —Con matses mibi caimbique. Mibēdi tabadebique. Mibi ismenu —quequin

con matses tabadacno abu ushu bëchamuanquieccquid chomequin ismepampic. Adashic nadpampic. —Ëmbi chiacpadec bëdamboec tabadsho mibi bëdamboen isquin bëdambo icmendambi. Mibi nianenquio iquendambi —queshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquio ictequid chuiquin: —Mibi bëdambo icmendambi —quequin Nuquin Papan con matses chuiampic ëndenquimboshë. ⁵ Abadauan chuiquinc Isac chuiquinc Acobo chuiquinc capampic. Ambi chiacpadomboen Isadaidbon chidon tishac Esuquidistu matsesac caondash. Nuquin Papapadquidquibi yec abitedishun Ibo yec matsesac caondashe. Esus chuiquin: —Nuquin Papa padquibi yec mibi bëdamboshë iquec —canuna ënenquio icquin.

⁶ Ëmbi chiacpaden Esus tantienquio icsho Nuquin Papan con matses dadpen bëdamboen istiapimbo iquec. ¿Aden tantiashtabi nadpe? —Nuquin Papa muapampic. Ambi chiacpadomboen nainquio icquin con matses bëdamboen istiapimbo iquec —¿quectabi ique? Padenquio. Nuquin Papan abimbo chuiampic. Isadaidbo dadpenshun Nuquin Papa bëdamboen tantienquio iquec. Ambi tantiactedishun abi tantiasho ambi chiacpadomboen Nuquin Papan bëdamboen isec. ⁷ Ëndenquimboshë con tsusedpa Abadauanën mëdaidtedi adembidi Nuquin Papan bëdamboen isambo. Abadauanën mado abentsëqui Isac caic: —Aidën tsyuecquido ëmbi mibi cuënacpadomboen con matses caindambi —quequin Nuquin Papan chuiampic. ⁸ ¿Abadauanën bacuëbotedishun tsyuecquidotedida Nuquin Papan con matses caido nepec? Padenquio. Ambi chiacpadomboen Isaquën tsyuecquido Nuquin Papan con matses caido nec. ⁹ Naden Nuquin

Papan Isac tishte chuipampic. “Ëmbi tantiacpadën choashun ëmbi namiac Sadan min chidon dada bacuë tishendac,” quepampic Nuquin Papa Abadauan chiec.

¹⁰ Aden ambi: —Adoendambi —quequin chiacpadomboen naquidquio Nuquin Papa nec. Aden Nuquin Papan Isaquën bacuë abi ushëmbi daëd tishte chuipampic. Adnubien con tsusedpa Isaquën aton chido Debeca caid bedshun chudquin dada bacuë daëd usundomepampic Nuquin Papan chiacpadomboen. ¹¹⁻¹² Aid dada bacuë daëd tishabi icshobi Nuquin Papan ani naden chuipampic. “Ëmbi tantiacpadquid min madon utsimpi bëyucquidbimboecquid nendac,” quepampic. Aid daëd tishabi bëdamboec tabadtiapimbo icnubi: —Tishacsho ëmbi tantiacpadembi tsyuec tishsaidëmpi abentsëqui bëdamboen isendambi —quequin tantiec adpampic Nuquin Papa. ¹³ Adembidi Isaquën mado chuiquin Nuquin Papan ambi chiaid dada uamepampic. “‘Acobouidtsëqui tantiaquiquin aton buchimpi Esau bëdiactsëc tantiatsendambi,’ quepampic Nuquin Papa,” quequin dada uamepampic.

¹⁴ ¿Ëmbi aden chuisho tantiash: —Nuquin Papa ic-sambo iquec —quecta mibi ique? Ma Nuquin Papa ic-sapenquio icquid neyoc. Icsaquido yec matses abitedi ambi cuidtequido icsho Nuquin Papan ambi tantiactedi bëdamboen isec. ¹⁵ Aden Nuquin Papan con tsusedpa Moises chuipampic.

“Embi tantiactedi matses bëdamboen isendambi.

Aidtedi cuidenquio iquendambi,”

quequin chuipampic. ¹⁶ ¿—Ëmbembi nasho Nuquin Papan bëdamboen istsiash —quec matses bunacpadenda Nuquin Papan matses bëdamboen ispec? Padenquio. Ambi tantiactedishun abi tantiasho Nuquin Papan bëdamboen isendac. ¹⁷ Aden ambi tantiacpadomboen

ambi naid Nuquin Papan Equipito yacnocquido chuiquid dapa padaon caid chuiampic. “ ‘Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icho yec nadatiambo icquidquo nec, ma ëbi canu,’ quequin mibi chuiquid dapa icmiondambi. Mibi icsasho pacuënëdabcimboecnuc mibi icmembi,” quequin Nuquin Papan padaon chiaid Moisesën dada uapampic. ¹⁸ Aden ambi tantiacpadomboen utsi-utsien icsaido pacuënëdabcimboecnuc icmequin abi tantiamenquo iquec. Adembidi utsi-utsien bëdamboen isquin abi tantiamec.

¹⁹ ¿Ëbi adsho tantiashta mibi nadpe? —¿Atotsieshun Nuquin Papan matses cuidpec? ¿Abitedishun Icho icquin Nuquin Papan namiacta matsesën nainquo icpadic? —¿quecta ique? ²⁰ ¿Matses icquinda mimbi Nuquin Papa chushcapatsia? ¿Ambi uaido icquimbida nuqui nadope? —¿Atotsieshun ëbipadquid matses uao, Papa? —¿capenda nuqui ique? ²¹ ¿Ada abi nacnenquid matsun chushcapadic? Padenquo. Matsu nacnenquidën ambi tantiacpadomboen nacnenendac. —Nëid nidaid tëshë tëchu bëdambo icquid acte uetequid nacnenu. Nëid nidaid tëshë matsumpi icsactsëcquid opa acmete nacnenu —quequin matsu nacnenquid. Aden ambi tantiacpadomboen nidaid tëshun nacnenquid.

²² Adembidi nuqui uaquid Nuquin Papan ambi tantiacpadomboen naindac. —Abitedishun Icbombo yec comapenen tantiaquidquo nebi. Adquid icquin icsaido cuidquid nebique. Ismenu —queboedëmbi ambi cuidtequido baded cuidenquo iquec. Ambi ëndenquimboshë tantiacpadomboen aido icsano nidmendac. ²³ —Ma ëmbi bëdamboen isaidon naden tantianu. “Icsaisambo icquin matses bëdamboen iste bunquin Nuquin Papan icsaido badedi cuidenquo iquec,” quequin ma tantianu —

queshun icsaido badedi cuidenquoio iquec. Ambi ëndenquimboshë tantiacpadomboen ambi bëdamboen isaido abëdi tabadmendac.

²⁴ Aden ambi tantiacpadomboen Esus tantiasho Nuquin Papan nuqui bëdamboen isec. Isadaidbon abi tantiasho bëdamboen isquinc isadaidpembo matses utsibon abi tantiasho bëdamboen isquinc nuqui caindac. ²⁵ Ambi matses utsibotsen aden bëdamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ëmbi con matses cacmaidobi con matses cabenendambi.

Adembidi ëmbi bëdamboen tantiacmaidobi matses utsibo bëdamboen isbenendambi,”

quequin Nuquin Papan chiaid dada uashun ²⁶ nadentsen dada uapampic.

“Matses utsibo ambi con matses cacmaidobi ambi tantiacpadën aido abentse-abentsen Nuquin Papan bëdamboen isendac.

Bëdamboen isquin: ‘Con mado nec. Con champi nec,’ caindac,”

quequin Nuquin Papan matses utsibo bëdamboen iste chuiquin dada uapampic.

²⁷ Ambi con matses caidombi abi tantiatiapimbo icsho isash Nuquin Papa chushquiaid con tsusedpa Isayasën naden dada uapampic. “Masitedi dadpenquoio caidnëdaido isadaidbo daëdpactsëcshun abi tantiasho bëdamboen isquin aitedtsëqui Nuquin Papan cuidenquoio iquendac. ²⁸ Ambi chiacpadomboen ambi tantiacpadën matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasën dada uapampic. ²⁹ Nuquin Papan chiaid padpiden dada uaquin isadaidbo cuidte Isayasën chuiampampic naden.

“Shubu dadpen icquid Sodoma caid yacnocquidobëdta shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibëdquieci equendac.

Adembidi con matses Nuquin Papan uesquin cuidtsempanëdash.

Abitedishun Icho icquin con matses nibëdquiecnuc cuidtsempanëdash. Dadpen cuidquin daëdpectsëc cuidabi icpanëdash,”

quequin dada uapampic Isayasën.

Isadaidbo bëdamboen istiapimbo icte chiaid

³⁰ Aden Isadaidbo dadpenshun abi tantienquo icsho Nuquin Papan bëdamboen istiapimbo iquec. Padnuen matses utsibo: —Mabi Nuquin Papan bëdamboen isnu. Ambi chiacpadec bëdamboec tabadnu —quesabobi: —Ëbi cuidmenquo icnuec abided ciudadec unësaid Esus bëdamboshë iquec —quesho Nuquin Papan bëdamboen isec icsaisabimboecnuc. ³¹ Isadaidboen: —Moisesën chiampiduidi ëmbembi nasho Nuquin Papan bëdamboen isebe —queboedombi nainquo icsho Nuquin Papan bëdamboen istiapimbo iquec. ³² ¿Atotsieshun Nuquin Papan isadaidbo bëdamboen istiapimbo icpec? —Ambi chiacpadomboenuidi ëmbembi naquin Nuquin Papa bëdamboen ismembi —queboedombi adotiapimbo icquin Nuquin Papa bëdamboen ismequidquo Esus chieshënece. Adsho Nuquin Papan bëdamboen istiapimbo iquec. ³³ Esus tishabi icnuc isadaidbon Esus chieshënte chuiquin Nuquin Papan con tsusedpa naden dada uamepampic.

“Buintad bëdambo icquid istuidash: ‘Nëidquo shubu uanun nitsinembi,’ quiacbimboen

Edusaden yacno ëbi bëdamboen ismequidquo isadaidbobëd tabadmendambi.

Adec tabadsho anocquidon chieshënendac.

Aid chieshënquid nadquio iquendac. ‘Cuëte mabud iquec,’ quequin tantienquio yec nidec tocoshquetanec uebudacimboec

ëbi bëdamboen ismequid tantienquio yec unësash icsano nidendac.

Aid tantiaquido: ‘Nëid tantiasho Nuquin Papan abi yacno nuqui tabadmendac,’ quequid unësacsho ëbi yacno tabadmendambi,”

quequin Nuquin Papan ambi chiaid dada uamepampic.

10

¹ Con matses isadaidbo tantiac unësquio icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bëdamboen ista, Papa —quequin Nuquin Papa chianiombi. ² Esus tantiabi ëmbi chuidenecpadomboen chiec: —Nuquin Papan chiacpadomboenuidi naquin Nuquin Papa bëdamboen ismembi —quetsëcboedombi con matsesën Nuquin Papa bëdamboen ismete tantienquio iquec. ³ —Abided cuidadaid Esus tantiasho Nuquin Papan bëdamboen isebe —quetiadquidi icsamboen tantiec. —Nuquin Papan: “Bëdamboec tabadta,” quequin chiaid Moisesën dada uactedi naquin Nuquin Papa bëdamboen ismembi —quequin icsamboen tantiaquin Nuquin Papan tantiacpadomboen nainquio icquin Esus tantienquio iquec. ⁴ Esusuidtsëqui Nuquin Papan: —Bëdamboec tabadta —quequin chiaid Moisesën dada uactedi naquidquio nec. Adec icsaisa yec matses icsaid bedshunuec abided ciudadec unësac caondash. Nëbi Esus tantiasho Nuquin Papan matses bëdamboen isec icsaisabimboecnuc.

⁵ Nuquin Papan chiaid dada uaquin Moisesën chuipampic naden. “Ambi chiacpadomboenuidi naquid

Nuquin Papan bēdamboen isquin abēdi tabadmetsiash,”
 quequin Nuquin Papan chiaid Moisesēn dada uapampic.
 6 Aden ambi chiacpadomboenuidi natiadquidombi
 natiapimbo icsho Nuquin Papan matses bēdamboen
 istiapimbo icpanēdash. Nēbi abided cuidadaid Esus
 tantiasho nuqui bēdamboen isec. Adoac Esus tantiaquido
 nadenquio iquec. —Nuquin Papa yacno nidshun ḡtsuntsin
 Nuquin Papa nuqui bēdamboen ismepatsiashba? —
 quenquio nuqui iquec. —Esusquio Nuquin Papa
 bēdamboen ismequidquio nec —quequin nuqui tantiec.
 7 Aden tantiec: —ḡTsuntsin Nuquin Papa bēdamboen
 ismequidquio uincuemepatsiashba? —quenquio nuqui
 iquec. —Abided ciudadec unēsacsho Esus uincuemiāc
 caondash —quequintsen nuqui tantiec. 8 Aid tantiasho
 Nuquin Papan nuqui bēdamboen isec. Ambi bēdamboen
 iste chuiquin Nuquin Papan naden dada uamepampic.
 “Nuquin Papan chiaid chuisho tantiash: ‘Abimbo chiec.
 Aid tantiembi,’ qesho Nuquin Papan matses bēdamboen
 isendac,” quequin dada uamepampic. Nēbi Nuquin
 Papan chomiaid abided cuidadaid Esus tantiasho Nuquin
 Papan nuqui bēdamboen isec. Aden nuqui bēdamboen
 ismequid Esus chuibenequid nebi. 9 —Nuquin Papan
 uincuemiaid Esus abitedishun Icbo neque. Con Icbo Esus
 canu —quequin chuisho Nuquin Papan nuqui bēdamboen
 isquin cuidenquio iquendac. 10 —Ēbi cuidmenquio icnuec
 abided cuidadaid Esus tantiembi —quequin otacquo
 tantiaquidēn: —Esus tantiaquid nebi —quequin utsibo
 abimbo chuisho bēdamboen isquin Nuquin Papan
 cuidenquio iquendac.

11 Ambi chiaid Nuquin Papan dada uamiacpaden:

“Aid tantiec: ‘Nēid tantiasho Nuquin Papan abi yacno
 nuqui tabadmendac,’ quequid unēsacsho ēbi
 yacno tabadmendambi.”

¹² Isadaidbo yec matses utsibo yec quequido Esus tantiaquidtedi adoendac. Aden abitedishun Icho icquin abi tantiaquidtedi Esusën bédambo icmendac. ¹³ Aden Esusën nate chuiquin con tsusedpan Nuquin Papan chiaid dada uapampic. “‘Abitedishun Icbombo icsho mibi tantiaquid nebique. Ēbi bédamboen ista, Icho,’ qesho bédamboen isquin cuidenquo iquendac,” quequin dada uapampic.

¹⁴ ¿Mitsipaden matsesën Esus tantiabempec? ¿Esusën naid chiabi yacta matsesën tantiapec? Padenquo. Esusën naidquo chuibanaquien tantiendac. ¿Esusën naid chuisho tantiash: —Mua —quequidta Esus tantiaquid nepadic? Padenquo. —Abimbo caic —qeshun: —Min Mado Esus tantiembique. Ēbi bédamboen ista, Papa —quequidien Esus tantiaquid nec. ¹⁵ ¿Mitsipadoaidën Esusën naid chuibampec? ¿—Chuita —cacmaidënda chuibampec? Padenquo. Nuquin Papan: —Con Mado chuibeneta —caidien Esusën naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bédamboen iste chuibanquid chosho isash: ‘Bédambo iquec,’ quec matses cuishonquendac,” quequin dada uamepampic.

Isadaidbo dadpenshun Esus tantienquo yaid

¹⁶ Adquidën Esusën naid chuibanac isadaidbo dadpenshun Esus tantienquo iquec. Daëdpactsëcshun tantiec. Abi tishabi icnuc aden abi tantiesabo Esusën chuite Nuquin Papan con tsusedpa Isayas caid dada uamepampic naden. “Mimbi chiaidquo ěmbi chuibansho ¿tsuntsin tantiapec, Papa? Daëdpactsëcshun: ‘Abimbo mimbi chiec. Mibi tantiaquin mimbi chiacpadomboen naimbi,’ ěbi caindac, Papa,” quequin Esusën aton Papa chuite Isayasën dada uapampic. ¹⁷ Aden Esusën naid chuiban-sho tantiashun: —Abimbo caic —qeshun utsibon Esus tantiec.

¹⁸ ¿Esusën naid chuisho tantiabida con matses isadaid-bon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidën naid chuibanquidën chuibanendac.” Aden chuibansho ma con matsesën tantiaboc. ¹⁹ Aden Nuquin Papan chiaid chuisho tantiash: —Tantiadenquoio yec onquec —¿quepecta icnëdash con matses? Padenquoio. Tantiashi abi bëdamboen tantiate bunenquoio icsho isun matses utsibo bëdamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidbouidi ëmbi bëdamboen iste mimbi danubi ëmbi con matses cacmaidobi matses utsibo bëdamboen isbenendambi.

Ëmbi matses utsibo bëdamboen iso isash: ‘¿Atotsieshun Nuquin Papan matses utsibo bëdamboen ispec?

Icsambo iquec,’ quec mibi chushquendac.

Matses utsibobi ëbi tantiabi icquido ëbi tantiamendambi.

Aido bëdamboen isquin mibi nëishëmendambi,”

quequin Nuquin Papan Moises dada uamepampic.

²⁰ Adembidi dacuëdenquoio icquin Isayasën Nuquin Papan matses utsibo bëdamboen iste dada uapampic.

“ ‘Nuquin Papa tantiatiadquoio iquebi,’ quenquoio icquidombi ëbi tantiabenosh.

‘¿Mitsipadembimbi Nuquin Papa bëdamboen ismepeba?’ quesabobi ëmbi bëdamboen iste tantiamiombi,”

quequin Isayasën Nuquin Papan chiaid dada uapampic.

²¹ Isadaidbotsen chuiquin Nuquin Papan chiaidquibidi Isayasën naden dada uapampic. “ ‘Mibi tantiac unësquoio iqueque. Ëbi bëdamboen tantiata,’ cadeniaqui: ‘Padi, mibi tantiatiapimbo iquebi,’ quequin ënenquoio icquin ëmbi chiaid mimbi niac-niacpec,” quequin Nuquin Papan chiaid Isayasën dada uapampic.

11

Ambi chiactedi isadaidbo Nuquin Papan bēdamboen isaid

¹ ¿Ambi chiaid niac-niacsho isadaidbotedida Nuquin Papan chieshēmpec? —Con matses catiapimbo iquebi — ¿quecta iquec? Padenquo. Isadaidbombo nebi. Ĕndenquimboshē con tsusedpa Abadauan campidēn baban tishmiaid Benaminēn tsyuecquidon tsyuecquid yec isadaidbombo nebi. Adquid icsho Nuquin Papan chieshēnenquo iquebi. ² Ĕndenquimboshē nidaid uabi icquimbi Nuquin Papan: —Con matses caindami —quequin con matses isadaidbo tantiapampic. Adshun abitedi chieshēnenquo iquec. ¿Ediasēn chiampid tantienquioda ique? Aton matses isadaidbo nēishēnshun Nuquin Papa naden chuipampic. ³ “Mimbi con matses caidotedi icsamboshē icquec, Papa. Mimbi chiaid chuibanquidobi cuesun secac. Papa quequin mibi menequin ismete cuēnote nacenaid uesquin chic-chicpac, Papa. Icsamboshē iquec. Ĕbiuidtsēqui bēdambo iquec. Mimbi chiaid chuibancho tantiaishun Ĕbi cuesunetiadquo iquec, Papa,” quequin Ediasēn Nuquin Papa chuipampic. ⁴ Adoac ¿mitsipadomboen Nuquin Papan chuipampic? “Ĕbi tantiaquido abi iquec. Ĕmbi namiacpadomboen isadaidbo dadpenshun 7000tedishun Ĕbi tantiec. Ĕbi tantiesabon papa quequin nacenaid Bad caid tantienquo icquin Ĕbi tantiec,” quequin Nuquin Papan Edias chuipampic. ⁵ Adembidi nēbi con matses isadaidbon ambi tantiactedishun Esus tantiasho Nuquin Papan bēdamboen isec. ⁶ ¿Ambembida con matsesēn Nuquin Papa bēdamboen ismepec? Padenquo. —Ĕmbi chiacpadomboenuidi nasho matses bēdamboen isembi —¿quecta icpec Nuquin Papa? Padenquo. Aden naquid nibēdsho bēdamboen istiapimbo icboedēmbi ambi tantiactedishun icsaboedon Esus tantiasho Nuquin Papan bēdamboen isendac.

⁷ Isadaidbon ambi tantiactedishun Esus tantiasho Nuquin Papan bēdamboen isec. Isadaidbo utsiboen bēdamboen istiapimbo iquec. Aido: —Nuquin Papa bēdamboen ismete bunquin ambi chiacpadomboenuidi ėmbimbo nanu —queboedombi nainquio icsho Nuquin Papan bēdamboen istiapimbo iquec. Abi bēdamboen ismequidquo Esus chieshēsho Nuquin Papan pacuēnēdabimboecnuc isadaidbo icmepanēdash. ⁸ Aden ambi isadaidbo pacuēnēdabimboecnuc icmete chuiquin Nuquin Papan dada uamepampic naden.

“Nuquin Papan pacuēnēdabimboecnuc icmiac Nuquin Papan chiaid chiaqui tantiatiapimbo iquec,” quequin dada uamepampic. ⁹ Adembidi ambi isadaidbo pacuēnēdabimboecnuc icmete chuiquin Nuquin Papan con tsusedpa Dabid naden dada uamepampic ėndenquimboshē.

“Ĕbi bunaiduidi naic ėbibi bēdambo iquebi,’ quequidėmbi Nuquin Papa bēdamboen tantienquo iquec.

Adsho Nuquin Papan cuidpashun.

Cuidadnushi abimbo chiaid danec: ‘Ĕmbembi naic bēdambo iquebi,’ quendac.

Adec abi tantienquo yec icsasho Nuquin Papan cuidpashun.

¹⁰ Pacuēnēdabimboecnuc icmequin Nuquin Papan abimbo tantiamenquo icpashun.

Natiamequin shubimepashun,”

quequin Nuquin Papan chiaid Dabidēn dada uapampic.

Nuquin Papan matses utsibo bēdamboen isbenaid

¹¹ ¿Aden pacuēnēdabimboecnuc icmiac Esus tantiatiapimbo icsho isadaidbo padpiden bēdamboen tantiametiapimboda Nuquin Papa icpec? Ambi tantiacpadomboen bēdamboen tantiamendac. Nēbi isadaidbo dadpen

bëdamboen istiapimbo icquimbi matses bëdamboen iste bunquin Nuquin Papan matses utsibo Esus tantiamequin bëdamboen isbenec. —Ëmbi adosho isash isadaidbotsen ma nadnu. “Nuquin Papa bëdamboen ismete bunquiebique. Ëmbitsen Esus tantianu,” ma quenu —qeshun Nuquin Papan aden matses utsibo ambi bëdamboen iste tantiamiac. ¹² Ambi chomiaid Esus tantienquio icsho isadaidbo dadpen bëdamboen istiapimbo icquimbi matses utsibon Esus tantiasho ambi con matses caido isadaidbobimboecnuc Nuquin Papan bëdamboen isbenec. Ambi tantiacpadën ambi tantiamiacpadomboen isadaidbo dadpeshun Esus tantiabensho Nuquin Papan bëdamboen isendac. Adshumbic matses utsibobëdta isadaidbo Nuquin Papan bëdamboshë icmendac.

¹³ Tanta, matses utsibo. Mibitsen chuinu. Nuquin Papan icmiacpadomboen matses utsibo Esusën naid chuibenequidquio nebi. Ëmbi chuibeneboed con matses isadaidbo chuibanombi naden. —Esusën naid ëmbi chuibeniac matses utsibon Esus tantiabenosh. Adsho Nuquin Papan aido bëdamboen isbenosh —quequin con matses chiombi. ¹⁴ —Aden Nuquin Papan matses utsibo bëdamboen isaid ëmbi chuisho tantiash Nuquin Papa bëdamboen ismete bunquin Esus tantiatsiash. Adsho Nuquin Papan bëdamboen istsiash —qeshun con matses aden chiombi. ¹⁵ Aden isadaidbon Esus chieshënsho isun Nuquin Papan matses utsibo Esus tantiamequin bëdamboen isbenac. Ambi tantiacpadëmbi isadaidbontsen Esus tantiasho Nuquin Papan bëdamboen isbenendac. Isadaidbontsen Esus tantiabededsho isumbic Nuquin Papan matses unësaidotedi uincuemendac. ¹⁶ Con tsusedpa Abadauan abi tantiaquidquio icsho Nuquin Papan bëdamboen isquin: —Con matses mibi caimbi. Adembidi min tsyuecquidotsen ëmbi chiactedi con matses caindambi —quequin ambi chiacpadomboen isadaidbotedi

Nuquin Papan con matses caindac. Ambi nitsinaid cuête caniacsho: —Tapunuidtsëqui con na nec. Dada con napenquio nec —¿capenda icbon iquec? Padenquio. —Abichobi con na nec —caquid. Adembidi Nuquin Papan isadaidbotedi con matses caic. Caniec taëquid cuête tapumbimboecquid abia con matses caid Abadauan nec. Cuête cuidibimboecquido Nuquin Papan con matses caidobidi Abadauanën tsyuecquido isadaidbo nec.

¹⁷ Aden ambi con matses caidombi ambi chomiaid chieshënsho cuête cuidi utsi pobinun pateshuniacbimboen Nuquin Papan isadaidbo dadpen bëdamboen istiapimbo iquec. Matses utsibo Esus tantiamequin cuête dada utsi pobiacbimboen aton matses icmequin ëbipadquid isadaidbo ambia Esus tantiaquidobëdta Nuquin Papan mibi bëdamboen isec. ¹⁸ Adoac icsamboec onquenda. —Isadaidbo dadpen bëdamboen isenquio icquin Nuquin Papan ëbien bëdamboen isec. Isadaidbo icsambo iquec. Èbien bëdambo iquec —quequin icsamboen chienda. Aden icsamboen chuitiadquio icquimbi nëid chiaidtsen tantiata. Cuête tapunabi icnuc dada yec podo yec quec cuête ictiapimbo ictsiandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibëdtsempampic. Isadaidbo nibëdnuc isadaidbon chidon Esus tishenquio ictsempañëdash. Èmbi aden chiac isadaidbo chiec icsamboec onquenda.

¹⁹ ¿Èbi adsho tantiashta mibi nadpe? —Ambi con matses caido chieshëmënsho isun cuête cuidi pateshuniacbimboen nëbi isadaidbo dadpen Nuquin Papan bëdamboen isenquio iquec. Èbipadquid matses utsiboen bëdamboen isbenac —¿quecta ique? ²⁰ Abimbo mimbi caic. ¿Atotsieshun Nuquin Papan isadaidbo bëdamboen istiapimbo icpec? Ambi chomiaid Esus tantienquio icsho Nuquin Papan aido bëdamboen istiapimbo iquec. Pad-

nuen Esus tantiasho mibi bēdamboen isec. Adoac: —Ēbi bēdambo icnubi isadaidbo icsambo iquec —quenda. — Esus tantienquo icsho isadaidbo cuidacpadomboen ēbitsen Nuquin Papan cuidpanundac —quequin Nuquin Papa Esusbēdta tantiaquiota. ²¹ Ambi con matses caidon Esus tantienquo icsho Nuquin Papan bēdamboen istiapimbo iqueque. Adembidi matses utsibon Esus tantienquo icsho Nuquin Papan mibi bēdamboen istiapimbo iqueque. Esus tantiaquiota.

²² Aden Esus tantiash nadec onqueta. —Esus tantiasho bēdamboen isquid yec Esus tantienquo icsho isun cuidquid Nuquin Papa nec —cata. Esus tantienquo icsho cuēte cuidi pateshuniacimboen cuidquin isadaidbo bēdamboen isenquo iqueque. —Esus tantienquo yansho adembidi ēbitsen cuidpanundac —qeshun chieshtoenquo icquin Esus tantianuna. ²³ —Padi, aid tantiatiapimbo iquebi —queboedombi isadaidbon Esus tantiabensho abēdi tabadmenuen Nuquin Papan bēdamboen isendac. Ambi cuēte cuidi pateshuneboedi abibidi pobioacimboen padpiden bēdamboen isendac. ²⁴ Min matses abitedi Nuquin Papa tantiesabo icnēdash. Nēbien cuēte icsan cuidi pateshuniaid pobiacimboen Esus tantiamequin Nuquin Papan mibi bēdamboen isec. Adoac Esusbēdta Nuquin Papa mimbi bēdiactsēc tantiatsec. Con matses isadaidbo tsusedpabo Nuquin Papa tantiaquido dadpenquo icpampic. Nuquin Papan tantiamiac Esus chote chuiquin ěnden dada uapampic. Ambi tantiacpadēn ambi cuēte bēda cuidi peteshuniaid abibidi pobioacimboembi Esus tantiamequin Nuquin Papan con matses isadaidbo bēdamboen isendac. Adoac cuēshēduidboedombi Nuquin Papabēdta Esus bēdamboen tantiaquiendac.

Ambi chiacpadēn Nuquin Papan isadaidbotsen bēdamboen

isoaid

²⁵ Tantia. —“Isadaidbo icsambo iquec,” quequin chui-nushe —queshun mimbi tantiacmaid Nuquin Papan chaid mibi chuinu. Nuquin Papan pacuënëdacbimboecnuc icmiac con matses dadpen Esus tantiate bunenquoio iquec. Daëdpactsëcshun Esus tantiec. Nuquin Papan tantiactedishun matses utsibo dadpeshumba Esus tantiambic ²⁶ paposhquiabimboen con matses isadaidbo dadpeshun Esus tantiendac. Aden tantiasho Nuquin Papan con matses bëdamboen isendac. Aden ambi isadaidbo bëdamboen iste chuiquin Nuquin Papan naden dada uamepampic.

“Icsambo icquidobi cuidmenquoio icnuc Nuquin Papa yacnuësh choquid isadaidbon chidon tishaid iquendac.

Aidëmbi isadaidbo Nuquin Papa tantiaquid padpiden icmendac.

²⁷ ‘Aden ëmbi chiacpadomboen ëmbi chomiaid tantiasho abi icsaid bëpiscudquin isadaidbo bëdamboen isendambi,’ quependac Nuquin Papa,”

quequin ambi chiaid Nuquin Papan dada uamepampic.

²⁸ Nëbi Esus chieshënsho isadaidbo bëdamboen isti-apimbo icquin Nuquin Papan matses utsibo mibi Esus tantiamiac. Ambi nëbi bëdamboen istiapimbo yaido isadaidbo unësquoio icnuc Nuquin Papan tantiaquiec. — Ëmbi aton tsusedpabo chiampicpaden aido con matses caimbi —queshun adoec. ²⁹ Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic. ³⁰ Min matsesën isadaidpembon Nuquin Papa tantienquoio yacbimboen nëbi isadaidbon Nuquin Papa tantiamequid Esus tantienquoio iquec. Aden Esus tantiatiapimbo icsho isun Nuquin Papan Esus tantiamequin matses utsibo bëdamboen isbenac.

³¹ Con matsesëmbien abided cuidadaid Esus chieshënquin

Nuquin Papan chiaid niac-niacpec. Adoboedombi: — Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bēdamboen isendac. ³² Aden matses abitedishun ambi chiaid niac-niacsho isun: —Abitedimbo icsaquiec —quequin matses bēdamboen istiapimbo icboedēmbi nēbi Esus tantiasho Nuquin Papan bēdamboen isendac isadaidbo yec matses utsibo abitedi yec quenuc.

³³ Aden Nuquin Papan bēdamboen iste chuisho tantiaish nadnuna. Nuquin Papa bēdamboshē iquec. Abipadquid utsi nibēdec. Matsesēn naidtedi tantiaquidquio nec. Abitedimbo tantiaquid icquin ambi natiapimbo ictequid nibēdnuc bēdamboen naquidquio nec. ¿Ada adquid icsho Nuquin Papan naidtedi matsesēn tantiapadic? Padenquio. Ambi naidtedi matsesēn tantienquio iquec. ³⁴ “¿Nuquin Papan otacquio tantiaidtedida matsesēn tantiapadic? Padenquio. ‘¿Mimbi tantienquio iquec. Ĕm̄bi chiacpadomboen nata,’ quequinda matsesēn Nuquin Papa chuipadic? Padenquio. Ambi tantiacpadomboembien Nuquin Papan naindac.” ³⁵ “¿Ada matsesēn Nuquin Papa menepadic? Padenquio. ‘Nē. Con na bedquin mitsana ěbi cuidquin mene, Papa’ ¿quequinda Nuquin Papa chuipadic? Padenquio. Matsesēn: ‘Con na nec,’ caidtedi Nuquin Papan na nendac.” ³⁶ Abitedimbo uaquidquio yec abitedishun Icbombo Nuquin Papa nec. —Uesadec nibēdanushe —quequin abitedimbo isquidquio nec. Aton na abitedi nec. Adec abitedishun Icbombo icsho: —Nuquin Papa bēdamboshē iquec —canuna ěnenquio icquin.

¹ Con utsibobimboecquido mibi neque. Tantia. Mibi chuinu. Nuqui cuidmenquo icnuec abided cuidadaid Esus tantiasho Nuquin Papan nuqui bēdamboen isequē. Nuquin Papa bēdamboen tantiatiadquo icquin nadonona. —Ĕbi bunaid nainquo yec mibi bēdambo icmenuēc mimbi chiacpadec bēdamboec tabadtiadquo iquebique. Min yuambo ěbi icme, Papa —quequin Nuquin Papa chuinuna. ² Esus tantiesabon nacpadomboen nainquo icquin Nuquin Papan Mayanēn pausunacpadomboen Esus tantiaquin nuqui icsate bunaid ěnuna. Aden nuqui icsate bunaid ěnquin Nuquin Papa bunacpadec bēdamboec tabadquin nuqui tantiendac. Aden naic nuqui bēdambo iquendac.

³ Tantia. Nuquin Papan tantiamiacpadomboen mibi chuinu. Nadenda. —Ĕbiuidtsēqui bēdambo iquebi. Utsibo abitedi icsambo iquec —quenda. Nuquin Papan Mayanēn tantiamiacpadec mibibi datantiadec: —Adquid nebi —quequin abimbo chuita. ⁴ Nuquin Papan Mayanēn tantiamiacpadomboen naquid Esus tantiaquidēn. Adquid yec ¿ada Esus tantiaquido abitedi chuiquid dapa yampatsiash? Padenquo. ¿Mitsipadquo min dada icpec? ¿Abichobida bedantequid icpec? Padenquo. Mēdan-teuidtsēquien bedantequid iquec. ¿Abichobida istequid icpec? Padenquo. Ĕshēuidtsēquien istequid iquec. ¿Abichobida shēdtequid icpec? Padenquo. Dēbia-teuidtsēquien shēdtequid iquec. ⁵ Min dada yacbimboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidotedi yec bēdamboec tantiananquin nashunanquido yanec. ⁶ —Ma utsibo nashunu —queshun Nuquin Papan Mayanēn namiaid nec Esus tantiaquido. ¿Atotsi naquid Nuquin Papan Mayanēn mibi icmiac? Nuquin Papan ambi tantiaidquo oncamiaid

iquendac. Adquid icquin Nuquin Papan Mayanën tantiamiaiduidi chuibanta. ⁷ Utsibic: —Utsibo nashunquid icta —caid iquendac. Adquid icquin bēdamboen nashumbanta. Utsibic Nuquin Papan: —Ēmbi chiaid bēdamboen tantiashun chuibanta —caid iquendac. Adquid icquin Nuquin Papan chiaid tantiatsēcquido bēdamboen tantiameta. ⁸ Utsibic: —Chieshtoenquo icquin Esus tantiec bēdamboec tabadnuna —quequin bēdamboec tabadquin ismequid iquendac. Adquid Nuquin Papan icmiaid icquin Esus tantiaquido bēdamboec tabadte tantiameta. Utsibic aton na nibēdquido aton na menequid Nuquin Papan icmiaid iquendac. Adquid icquin cudasenquo icquin menianeta. Utsibic: —Esus tantiaquido chuiquid dapa icta —caid iquendac. Adquid icquin Esusën namiacpadomboen Esus tantiaquido bēdamboen nameta chieshenquo icquin. Utsibic dada icsaido yec isedanquido yec aton shubu nibēdquido yec aton pete nibēdquido yec macho yec tsusioctšec yec qesho bēdamboen nashunquid iquendac. Adquid icquin Esusën chiacpadomboen chieshtoenquo icquin nashumbanta.

Esus tantiaquidon nadoquid, quiaid

⁹ —Mibi tantiac unēsquo iquec —quequin utsibo chuiquin abimbo chuinuna. Muainquo icquin utsibo tantiaquionona. Chieshēmēnenquo yec bēdamboec tabadnuna. Utsibon: —Icsanuna —caqui: —Padi —quiash icsainquo yec bēdamboec tabadnuna. ¹⁰ —Ēbēdtan Esus tantiaquido con utsibobimboecquido nec —quiash bēdamboec tantiananuna. —Nēid con buchibimboecquid bēdambo iquec. Aidën chuisho bēdamboen tantianuna —canuna nuquibēdtan Esus tantiaquido chuiquin. ¹¹ Nuquin Papan chiacpadomboen naic chieshtoenda. Nuquin Papan Mayanën tantiamiacpadec Esus tantiec

chieshtoenquo yec bēdamboec tabadnuna. ¹² — Unēsacsho abi yacno Nuquin Papan ēbi tabadmendac —quec cuishonquenuna. Esus tantiaquido icscho utsibon chieshēnaqui chieshtoenquo icquin Esus tantianuna. ¿Atotsi natiamiante utsi icpec? Adquid tantiec shubiquimbi chieshtoenquo icquin Esus tantianuna. Baded¹badedquien Nuquin Papa chian-chianuna. ¹³ Nuquibēdtan Esus tantiaquido aton na nibēdsho isun nuquin nabi menenuna. Isedanquido bēdamboen isnuna. Pemequinc nuquin shubun ushmequinc canuna. ¹⁴ Esus tantiaquido yec nuqui chieshēnquidobēdi chieshēnanenquo icnuna. Chieshēnanenquo icquin Nuquin Papa naden chuinuna. —Ēbi chieshēnquido bēdamboen tantiameta. Chiesh bēdameta, Papa — quequin Nuquin Papa chuinuna. ¹⁵ Utsi bēdambo yec cuishonquesho isash aibdēdi cuishonquenuna. Utsi unēsquo icnuc shubisho isash aibdēdi shubinuna. ¹⁶ Cuesnanenquo yec chieshēmēnenquo yec bēdamboec tabadnuna. —Con nauidtsēqui naimbi —quenquo icquin utsibobēdtan bēdamboen nanuna. —Ēbiuidtsēqui bēdambo iquebi. Ēmbi tantiacpadomboenuidi naimbi. Utsibon chiaid natiapimbo iquebi —quenquo yec bēdamboec tabadnuna. —Chuiquid dapabēduidtsēqui onquequid nebi —quenquo yec matses abitedibēd onquec bēdamboec tabadnuna.

¹⁷ Chieshēnaqui cuidnanenda. —Ma utsibo: “Bēdamboec tabadquido nec,” quenu —quiash bēdamboecuidi tabadnuna. ¹⁸ Uimanēmēnquido icsasho isun aid chuiquin: —Bēdamboequien tabadtiad —canuna. Adquidobēd chieshēnanenda. ¹⁹ Ēmbi tantiaido mibi neque. Tantia. Chuinu. Nuqui chieshēnquidobēdi cuidnanenquo icnuna Nuquin Papan naden chiaid tantiash. “Matses cuidnanac icsambo iquec. Ēbentsēcquiobini ic-

saido cuidquid nec,” quequin Nuquin Papan chiaid dada uapampic. ²⁰ Nuqui chieshënquidobëdi cuidnanenquio icquin bëdamboen isnuna. “Pete bunsho pemequinc acte bunsho acmequinc canuna. Nuqui chieshënquido: ‘Bëdambo icquidi chieshë nec icsachitobi,’ quiash ma nëish bëdanu,” quiash ²¹ adec cuidnanenquio icquin nuqui chieshënquido bëdamboen isnuna.

13

Chuiquid dapan chiacpadomboen Esus tantiaquidën naquid

¹ Aton matses chuiquid dapan chiacpadomboen Esus tantiaquidën naquid. Adembidi aton nidaid pais caidën tabadquidotedi chuiquid dapabon chiacpadomboen naquid. —Nuquin Papan adquid chuiquid dapa icmiabi yac nibëdtsiash. Nuquin Papan chuiquid dapa icmiaidien aido nec —qeshun aidon chiacpadomboen naquid Esus tantiaquidën. ² Nuquin Papan chuiquid dapa icmiaidën chiaid niacquid Nuquin Papan chiaidbidi niacquid nec. Aden ambi chiaid niacacsho chuiquidon cuidquid. ³ Bëdamboec tabadquidon chuiquid dapan cuidte dacuëdëntiapimbo iquec. Adquido cuidenquio icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bëdamboec tabadta. Adsho isun: —Mibi bëdamboec tabadec —catsiash chuiquid dapabon. ⁴ —Ma matses bëdamboec tabadnu —quequin Nuquin Papan chuiquid dapa icmiaidën mibi bëdamboen tabadmetiadquio iquec. Nuquin Papan icmiac icsambo icquido cuidquid nec. Adquid icnuc: —Icsasho chuiquid dapan ëbi cuidpanundac —quiash icsaquid dacuëdendac. ⁵ Ëbi adsho tantiashun chuiquid dapabon chiacpadomboen nanuna. —Cuidnushe —qeshun adonona. —Pabiate cuembo icquin Nuquin

Papan chiacpadomboen natiadquio iquebi —queshun adonona.

⁶ Bëdamboen tabadmenuen Nuquin Papan chuiquid dapa icmiaidon: —Ëmbi chiacpadomboen nata —cac naquid Esus tantiaquidën. ⁷ Aden chuiquid dapan chiacpadomboen nanuna. Aid bëdamboen isnuna. Aidën: —Nata —cac nanuna chieshenquio icquin.

Utsibo tantiaquionona, quiaid

⁸ —Ëmbi nashumbocpadomboen ëbi cuidquin nashunenquio iquec —camenda. Abi nashunquidobëd cuidnanquid Esus tantiaquid. Esus tantiaquidbidi bëdamboec tantiananquid. Adec bëdamboec tantiananquin Nuquin Papan Moises chiampicpadomboen nuqui bëdamboen natsiac. ⁹ “Ambi naiduidtsëqui nainquio yec abibi datantiadac bimboec ma matses bëdamboec isnanu,” quequin Nuquin Papan Moises naden dada uamepampic. “Min chidopenquio chudenda. Adembidi min bënëpenquio chudmenda chidon. Cuesunenda. Ampenda. Utsin na isash: ‘Adquid con na nibëdosh,’ quec chieshëmë nec tabadenda,” quequin Nuquin Papan con tsusedpa Moises dada uamepampic. Aidën chiacpadomboen natiadquio icquin nuquibi datantiadac bimboen utsibotsen tantiaquionona. ¹⁰ Utsibo bëdamboen isquin aido icsa uatiapimbo nuqui ictsiac. Aden utsibo bëdamboen tantiasho Nuquin Papan: —Aden naic ëmbi Moises chiacpadec bëdamboec tabadec —caindac.

¹¹ —Nëbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushac bimboen nainquio icboedi nëbi ushash isucunac bimboec dayacquio yec chieshtoenquio icquin Nuquin Papan chiacpadomboen nanuna. Esus tantiabenash: —Yuecashien Esus choec —quiondaidi: ¹² —Nëbien Esus

chochitec —quedonetsēcquieç bēdamboec tabadnuna. —Satanasēn yuanushe —qeshun Esus tantiaquin nuqui icsaid ēnshun bēdamboen nanuna. ¹³ Icsainquio yec: —Bēdambo iquebique. Ma isnu —quiash bēdamboec tabadnuna. Tantiadenuen actequid paēmbo icquid aquenquio icquinc utsin chido chudenquio icquinc utsin bēnē chudmenquio icquinc chido utsi mēismenquio icquinc canuna. Adeçbidi utsin na isash: —Con na adquid nibēdec —quiash chieshēmēnec tabadenquio icnuna. Adembidi utsin mibi bunaid nasho isash: —Aden ēbi namenquio icpec —quec chieshēmēnenquio icnuna. Icsainquio yec bēdamboec tabadnuna. ¹⁴ —Icsate bunchitebi. ¿Mitsipaden naiquini icsape? —quenquio yec Esus tantiaquieç abi tabadacpadquieç bēdamboec tabadnuna. Nuqui icsate bunaid ēnquionona.

14

Esus tantiaquido utsibo bēdamboen isaid

¹ Nuquibēdtan Esus tantiatsēcquidon nuqui nacpadomboen nainquio icsho bēdamboen isnuna. Ambi chaidquio chuiquin Esus tantiaquidon natetedi Nuquin Papan uesquin chiabi iquec. —Naden nac bēdambo iquec. Naden nac icsambo iquec —quequin uesquin chiabi iquec. Aden Nuquin Papan chiacmaid chieç nuquibēdtan Esus tantiatsēcquido: —Ēmbi natemaid nec —qeshobi: —Icsamboen chieç —cainquio icnuna. ² Esus tanti-aquidquio: —Pete abitedi pambidbēdta pesho Nuquin Papan nēishēnenquio iquec —quenubien Esus tantiatsēcquid: —Padi. Pambid pesho isun Nuquin Papan nēishēnushe. Esus tantiaquidēn nitsinaid pequid. Pambid isuidquid —quepec. ³ Pambid pequidobēdtan pambid

isuidquidombi Esus tantiasho Nuquin Papan aid daëdi bēdamboen isec. Padnuen pambidbēdta pete utsi abitedi pequidēn pambid isuidquid mamēnshunac icsambo ictsiash. Adembidi pambid isuidquidēn: —Pambid pequid icsambo iquec —cac icsambo ictsiash. ⁴ ¿Icbonpenquioda: —Yua icsambo iquec —capadic? Icbombien adoquid. Adembidi: —Mibi bēdambo iquec —caquid icbon. Nuquibēdtan Esus tantiaquid Nuquin Icbon yua icsho: —Ēmbi nacpadomboen nainquio yec mibi icsambo iquec —cainquio icnuna. —Nēid icsambo iquec. Nēid bēdambo iquec —quequin Nuquin Icbo Esusēn ambentsēqui abi tantiaquido chiendac. Aidēn namiacpadomboen abi tantiaquidon bēdamboen naindac.

⁵ Esus tantiaquido utsi-utsiec: —Aid badiadquidēnuidtsēqui Esus tantiec cuēdēnac bēdambo ictsiash —quenubien utsibo: —Badiadquidēn badiadquidēnquiec Nuquin Papa Esusbēdta tantiec cuēdēnabi —quecuededpec. Adquid daēd icsho Nuquin Papan nēishēnenquio iquec. Esus tantiaquid ambi tantiacpadēnquio bi cuēdēnac bēdambo ictsiash. ⁶ Aden Esus tantiaquin nac bēdambo ictsiash. Adembidi Esus tantiaquin: —Mimbi pete uaid bēdambo iqueque. Aid penu, Papa —quequin pambid pequido iquendac. Utsibombic adembidi Nuquin Icbo tantiaquin: —Mimbi pete uaid bēdambo iqueque. Aid penu —queshun utsi pequimbi pambid isuidquid iquendac.

⁷ ¿Esus tantiaquid ambi naid-uidi naquidta nedic? Padenquio. ¿Ambi tantiacpadēn unēsquidta nedic? Padenquio. ⁸ Nuquin Icbo Esusēn chiacpadomboen natiadquio yec nuqui tabadec. Ambi tantiacpadēn nuqui unēsendac. Unēsabi yec tabadec Esusēn yuambo icboedi unēsash adecbidi aton yuambo nuqui iquendac. ⁹ Adec Nuquin Icbo icnuec abided ciudadec unēsash Esus uin-

cuempanëdash. Unësabi yec nuqui tabadnuc Nuquin Icbombo icboedi nuqui unësan adecbidi Nuquin Icbombo iquendac.

¹⁰—Adquid Nuquin Icbo iquec —quesho ¿tantiashunda nuquibëdtan Esus tantiaquid mamënshuntiad? Padenquio. ¿Nuquin Papan chiacmaid chiec: —Ëmbi nacpadomboenuidi nainquio yec icsambo iquec —quequina chushcatiad? Padenquio. Nuquin Icbo Esusbëdtan Nuquin Papanuidtsëqui matsesën naidtedi chiendac. —Nëid bëdambo iquec. Utsi icsambo iquec —quequin chiendac matses abitedishun tantianubi. ¹¹ Adote chuiquin Nuquin Papan ambi chiaid naden dada uamepampic.

“Tantia. Abimbo caimbique.

Naden matses abitedishun ëbi chiendac.

‘Abitedishun Icbombo mibi nec.

Bëdamboshë icquidquio mibi nec.

Abitedishun naid tantiaquid icquin mimbiuidtsëqui: Nëid icsambo iquec. Nëidien bëdambo iquec, quequin abimbo chiendac,’ quequin matses abitedishun ëbi chiendac,”

quequin Nuquin Papan dada uamepampic. ¹² Aden ambi cuidte ushën Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chuiba-nendac.

Utsibo icsamenquio icnuna, quiaid

¹³ Ëbi adsho tantiashun Nuquin Papan: —Adoenda —quequin chiacmaid nuqui tantiaid chienquio icnuna. —Ëmbimbo natemaid naic aido icsambo iquec —nuquibëdtan Esus tantiaquido cainquio icnuna. Adenquio icquin nadonona. —Ëmbi ambi natemaid nasho isash chieshtoshon Esus tantienquio yanushe. Ambi natemaid naquin ismenquio iquemi —qeshun Esus tantiaquidtedi bëdamboen isnuna. ¹⁴ Nuquin Icbo Esuquidistu

tantiaquidquo icquin ěmbien naden tantiec. —Nĕbi Nuquin Papan: “Petemaid nec,” caid nibĕdec —quequin tantiemi. Ębi adnubi utsibo: —Petemaidquo nec. Aid pec icsamane. Aid petiapimbo iquebi —queshumbi adquid pec: —Icsachitobi —quetsiash. ¹⁵ Adsho tantiashun aido bĕdamboen tantiaquin ambi petemaid nuqui pemenquo ictsiac. Ambi petemaid pemequin mimbi aido tantienquo iquec. —Ęmbi petemaid piash icsachitobi —quequin Esus tantienquo yanushe. Ambi petemaid pemenda. —Nĕid petemaid nec —quequido aidotsen tantiaquin cuidmenquo icnuec abided cuidadec Esus unĕsaque. Aido tantiata. ¹⁶ —Nuquin Papan chiaid niaquenquo icquin Esus tantiaquido utsibon: “Aden naic icsatsiash,” caid naimbi. Ęmbi tantiacpadomboen naimbi —queshun mimbi tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ęmbi natemaid naique —camenda. ¹⁷ ĵ— Nadquid petemaid nec. Nadquid actemaid nec —quequin petebĕdta acteuidi tantiecta Nuquin Papan chiacpadec Esus tantiaquido bĕdamboec tabadpatsiash? Padenquo. Aton Mayan nuquibĕdi tabadmiaic chieshĕmĕnenquo yec cuishonquec Esus tantiaquido bĕdamboec tabadendac. ¹⁸ Adec Esuquidistun chiacpadec tabadsho isun Nuquin Papan: —Bĕdambo iquec —caindac. Matsesĕntsen: — Aido bĕdambo iquec —caindac.

¹⁹ Ęmbi chiacpadec chieshĕmĕnenquo yec bĕdamboec isnanuna. —Esus tantiec chieshtoenquo yec bĕdamboec tabadnuna —quec chuinanuna. ²⁰ —Nuquin Papan bĕdamboen isaidon Nuquin Papa Esusbĕdta tantienquo yanushe —queshun utsibon petemaid pequin aido chieshtomenda. Nuquin Papan: —Matsesĕn petemaid nec —caid nĕbi nibĕdnubi Esus tantiatsĕcquidĕn petemaid pequin aid chieshtomec mibi icsatsiac. ²¹ —Ębĕdtan Esus tan-

tiaquido icsamemane —queshun ambi petemaid pambid penquo icquinc ambi actemaid acte paëmbo icquid aque-nquo icquinc ambi natemaid utsi nainquo icquinc cac bédambo ictsias. ²² Nuquin Papan: —Matsesën natemaid nec —cacmaid tantiaquin: —Ëmbimbo petequid nec. Ëmbimbo actequid nec. Ëmbimbo natequid nec. Aden nasho Nuquin Papan ëbi cuidenquo iquec —quequin mimbi tantiaid caic: —Natemaid nec —quequido naden chienda. —Ëmbi nacpadomboen nainquo yec mibi icsambo iquec —cainda. Adembidi aidon: —Ëmbi natemaid nec —caboed naquin ismenda. Chieshtonoshe. ²³ Adquid ambi: —Aid pesho Nuquin Papan nëishënitombini ictsias —caboed piash —Icsachitobi —quetsias. Adsho Nuquin Papantsen: —Ai, adec icsaic —catsias. —Aden naic icsa-chitequini ictsias —nuqui caidtedi naic nuqui icsatsiac.

15

Nuqui bunaiduidi nainquo icnuna, quiaid

¹ Esus tantiaquidënquo Esus tantiatsëcquid chieshënenquo icquid. —Natemaid nec —quequin Nuquin Papan chiabi icnubi Esus tantiatsëcquid: —Esus tantiaquin ëmbimbo natemaid nec —quesho tantiashun ambi natemaid naquin ismequin chieshtomenda. Aid tantiaquin ambi natemaid nainquo icquin nuqui bunaiduidi nainquo icnuna. ² —Esus tantiatsëcboedëmbi ma Esus bédamboen tantiabenquiono —quequin nuquibëdtan Esus tantiatsëcquidën natemaid nainquo icnuna. —Aden naic mibi bédambo iquec —camenuen ambi natemaid nainquo icnuna. ³ Esuquidistun ambi naiduidi nainquo icquin Nuquin Papan chiacpadomboenuidi naic abi chieshënidido yacnobi chopanëdash. Esus tishabi icnuc Esusën chuite chuiquin Nuquin Papan con tsusedpa naden dada

uamepampic. “Mibi chieshënacpadomboen chieshën-quin ëbi icsamboen chuishunec, Papa,” quequin Esusën abi chuite Nuquin Papan dada uamepampic. ⁴ Aden con matses isadaidbobëdta matses utsibo abitedi bëdamboen tantiamenuen Nuquin Papan ambi chiaid dada uamedenepampic. —Nëid isban-isbanquin ëbëdta Esus ënenquo icquin tantiec ma matses bëdamboec tabadnu. Adec bëdamboec tabadec: “Unësash Esusbëdi Nuquin Papa yacno tabadendabi,” ma matses quenu —queshun ambi chiaid dada uamepampic. ⁵ Aden matses chieshtoenquo icnuc bëdamboen tabadmequid Nuquin Papa mibi chianembi. —Chieshtoenquo icquin Esus tantiaquid icmequin dayacquio yacbimboecnuc matses bëdamboen tabadmequid mibi nec, Papa. Adquid icquin Doma yacnocquidon Esus tantiasho bëdamboec isnanquid icmeta, Papa. ⁶ Mimbi adoac: “Nuquin Papa chuinuna,” cac aidon abitedishun: “Ai, adonona,” queshun mibi naden chuitsiash, Papa. “Con Icbo Esuquidistun Papa mibi nec. Mibi bëdamboshë iquec,” quequin mibi chuitsiash, Papa —quequin Nuquin Papa mibi chianembi.

Nuquin Papan matses utsibo Esus tantiamiaid

⁷ Tantia. Padpiden mibi chuinu. —Nuquin Papa bëdambo iquec —nuqui camenuen Esuquidistun nuqui bëdamboen iseque. Bëdamboec isnanuna. Isadaidbo yec isadaidpembo yec quec bëdamboec isnanuna. ⁸ Esuquidistu matses abitedi bëdambo icmenuec matsesbëd tabadpanëdash. Esus chote chuiquin Nuquin Papan dada uamepampicpadec isadaidbobëdi tabadquin Esusën aido nashumpanëdash. —Nuquin Papan abimbo chuiampic —quequin tantiamenuen adopanëdash. ⁹ —“Icsaboedombi Esus tantiasho Nuquin Papan bëdamboen isquin cuidenquo iquec. Nuquin Papa bëdambo iquec,” ma isadaidpembo matses utsibo quenu —quecbidi Esus

matsespanëdash. Aidën abi chuite chuiquin Nuquin Papan naden dada uamepampic.

“Isadaidpembo matses utsibobëdtan mibi naden chien-dambi.

‘Nuquin Papa bëdambo iquec,’ caindami mibi.

Adecbidi mibi bëdamboen tantiec cuëdënendabi,”

quequin Esusën abi chuite Nuquin Papan dada uamepampic. ¹⁰ Nadembidi isadaidpembon matses

utsibon abi tantiabente chuiquin Nuquin Papan con tsusedpa dada uamepampic.

“Matses utsibo isadaidpembo mibi chuinu.

Nuquin Papan con matses caidobëdi cuishonqueta.

‘Nuquin Papa bëdambo iquec,’ quec cuishonqueta,”

quequin Nuquin Papan chiaid dada uapampic. ¹¹ Nuquin Papan chiaidbidi con tsusedpan padpiden naden dada uapampic.

“Isadaidpembo matses utsi abitedi mibi chuinu.

‘Nuquin Papa bëdambo iquec,’ cata.

‘Nuquin Papa bëdambo iquec,’ quec cuëdëncuededec tabadta,”

quequin dada uapampic. ¹² Adembidi isadaidpembon matses utsibon Nuquin Papabëdta Esus tantiabente

chuiquin Nuquin Papan con tsusedpa Isayas naden dada uamepampic.

“Dabidën papa Isai caid ënden unësampidën tsyuecquid yuecash iquendac.

Nidaid utsi-utsiec yacno tabadquidotedi chuiquid dapa icquinqin bëdamboen namendac.

Aid caic: ‘Nëidën nuqui cuidmenquio iquendac,’ quependac isadaidpembo matses utsibo,”

quequin dada uapampic.

¹³ Aden chiampid mibi nec. Nuquin Papa Esusbëdta tantiaquido icsho mibi Nuquin Papa chianembi. —Mibëdi

matses tabadmequidquo mibi neque. Mibi tantiamequin Doma yacnocquido cuishoncameta, Papa. Adembidi dacuëdenquo icnuc bëdambo icmeta. Aden min Mayan aidobëdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

Matses utsibo Esus chuibanquid nebi, quiaid

¹⁴ Con utsibo mibi caimbique. Tantia. Mibi chuinu. —Nuquin Papan Mayanën tantiamiacpadec bëdamboec isnanec bëdamboec tabadtiaidquo icquidien nec. Aidën tantiamiacpadomben Nuquin Papan chiaid bëdamboen tantiec: “Nuquin Papan chiacpadec bëdamboec tabadnuna,” quec chuinanquidien nec —quequin mibi tantiombi. ¹⁵ Aden tantias: —Nëishënushe —quenquo icquin: —Bëdamboec tabadta —quequin chuiquin nëid dada uaimbi. Nuquin Papan: —Esus chuibeneta —caid icquin mimbi ënden tantiaidbidi Esusën naidquo bëdamboen mibi tantiamenuen dada uaimbi. ¹⁶ Nuquin Papan icmiacpadquid Esusën naid chuibenequidquo nebi. Adquid icquin isadaidpembo matses utsibo Esus tantiaquido Nuquin Papan bëdamboen iste chuibeniombi. Adoac matses utsibon Esus tantiabensho isun aton Mayanën bëdamboen tabadmesho: —Bëdambo iquec —caindac Nuquin Papan.

¹⁷ Aden: —Esuquidistu bëdamboshë iquec —quequin matses utsibo dadpen Esusën naid chuibeniombi. ¹⁸⁻¹⁹ Esuquidistun ëbi namiaiduidtsëqui mibi chiec nendabi. Aidëmbi namiac matses utsibo Esusbëdtan Nuquin Papan naid chuibenequimbi Nuquin Papan Mayanën tantiamiacpadomben comapenen tantiaquin nacnenquin ismebeniombi. Adosho isun Esus tantiabenshun dadpenshun Nuquin Papan chiacpadomben natiadquo yanosh. Shubu dadpen

icquid Edusaden yacnuësh ënapen nidash nidaid utsi Ididico caid yacno nidshun chuibeniombi. Ambo nidtanec choaobi Edusaden yacnobidi. ²⁰ Esusën naid chiacmanouidquio Esusën naid chuibenetiadquio iquebi. Utsibon Esusën naid chuibanacno nidtiapimbo iquebi. Esusën naid chuisho tantiacmaido Esus chuite bunquiebi. ²¹ Aden nate chuiquin Nuquin Papan con tsusedpa naden dada uamepampic.

“Nuquin Papan chomiaidën naid chuisho tantiacmaidon tantiabenendac.

Adshun paposhquiacbimboen bëdamboen tantiendac,” quequin dada uamepampic. ²² —Aden Esusën naid chi-ambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusën naid tantiaash —quiash mibi yacno nidabi iccobi. Nëbi mibi yacno nidtiadquio iquebi.

Mibi yacno nidtiadquio iquebi, quiaid

²³ —Nëbi Ididico yacno Esusën naid uesquin chuibeniac —quiash mibi yacnotsen nidtiadquio iquebi. Ëndenquimbo taëec mibi yacno nidte bunondaide seta dadpen matamiashic adi nëbi mibi iste bunquiebi. ²⁴ Nidaid utsi Espania caid yacno nidquimbi mibi isbidanendambi. Doma yacno nidash mibëdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibëdi nidendac —ëbi caindac mimbi. Aden tantiec mibi yacno isbidantiadquio iquebi. ²⁵ Nëbini Edusaden yacnoba nidendac. Anocquido Esus tantiaquido utsibon meniaid menenuc nidendabi. ²⁶ —Edusaden yacnocquido Esus tantiaquido utsi-utsiec aton piucquid nibëdeque. Nuquin nabi ma buanshunu. Menenuna —queshun Esus tantiaquido icquin Acaya yacnocquidobëdtambi Masedonia yacnocquidon: —Con na

buanshun meneta —caposhi. ²⁷ Aden ambi tantiac-paden nasho: —Bëdambo iquec —caombi. Edusaden yacnoshon Esusën chiac isadaidbomba Esus tantiapanëdash. Adshumbic aidon chuibeniac matses utsibontsen Esus tantiapanëdash. Aden abi nashunquin chuiquido Edusaden yacnocquido caic: —“Piucquid nibëdec,” quiac caoshe. Menenuna —quesho: —Bëdambo iquec —caombi. ²⁸ Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibëdquido menebanash nidaid utsi Espania yacno nidquin mibi isbidanendambi. ²⁹ Mibëdi tabadquin ëmbi Esus tantiamequin chuisho Esusën nuqui bëdambo icmendac.

³⁰ Ëmbi tantiaidombo mibi neque. Tantia. Chuinu. Nuquin Icbo Esuquidistun aton Mayambëdtan tantiamiacpadec nuqui bëdamboec tantiananec. Ëbi tantiaquin Nuquin Papa chianeta. —Ënenquio icquin Esus tantiamequin mimbi chiacpadomboen Pabado name, Papa. ³¹ Udeya yacno nidsho Esus chieshënquidon Pabado cuneshe. Bedmenda, Papa. Piucquid buanacsho Edusaden yacnocquido Esus tantiaquido bëdamboen bedmeta, Papa. “Matses utsibon isadaidpembon meniaid bedtemaid nec,” quequin bedenquio icnushe. Bëdamboen bedmeta, Papa —quequin Nuquin Papa chianeta. ³² Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bëdamboec tabadendac Esus tantiamenanec. ³³ Aden mibi tantiaquin: —Nuqui dacuëdenquio icnuc bëdambo icmequid Nuquin Papa mibëd icpashun —caimbi.

16

Mibi unësquio iquec, quequin chiaid

¹ Nuquibëdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bëdamboen ista. Shubu dadpen icquid Senquedeya caid yacnoshon utsibo bëdamboen nashunquidquio nioshe. ² Pebe bëdamboen ista. Utsibobëdta ëbitsen bëdamboen nashunoshe. —Nuquibëdtan Esus tantiaquid nec —qeshun bëdamboen isquin aidën: —Ëbi nashunta —cacpadomboen aid nashunta.

³ Aquida caidbëdta aton chido Pidisida caid chuiquin: —Mibi caic: “Unësquio iquec,” quiosh Pabado —cata. Aidon ëbëdtan Esusën naid chuibeniondashe. ⁴ Aden Esusën naid chuibenesho: —Cueschitomane. Aden chienda —Esus chieshënquidon caqui aidon adembidi ëbëdtan Esusën naid chuibeniondash. Adsho isun: —Mimbi bëdamboen naoc —caondambi. Adembidi aidon chiondaidon isadaidpembon chiondash. ⁵ Aquidan shubuno Esus tantiec cuëdë nec cho-choquidotsen chuita. —Mibi caic: “Unësquio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabenondayid ëmbi tantiaidquio Epeneto caidtsen adembidi chuita. ⁶ Nëidtedi chuiquin: —“Mibi unësquio iquec,” quiosh Pabado —cabanta. Nëidic Madia caid mibi nashunquidquio. ⁷ Nëidic con matses isadaidbo Andedonico caid. Nëidic con matses Unias caid. Aidon ëbëdtambi Esusën naid chuibenesho chieshëmënquidon bedshun quënën nauedondash. Aidombien ambia Esus tantiabempac caondash ëmbi padabi icnubi. Adsho aidoba Esusën: —Ëbi chuibeneta —cac chieshtoenquio icquin Esus chuibenequido nec.

⁸ Nëidteditsen chuiquin: —“Mibi unësquio iquec,” quiosh —cata. Nëidic Esus tantiaquid utsi Ampidias caid

ëmbi tantiaidquio. ⁹ Nëidic Esusën naid chuiquid utsi Udbano caid. Nëidic ëmbi tantiaidquio utsi Estaquis caid. ¹⁰ Nëidic Apedes caidtsen. Utsibon chieshënaqui chieshtoenquio icquin Esus tantiaquidquio nec. Nëidic Adistobudo caidën shubun icquidotedi. Aidedi: — Mibi caic: “Unësquio iquec,” quiosh Pabado —cabanta. ¹¹ Nëidotsen adembidi chuita. Nëidic con matses utsi Edodion caid. Nëidic Nadsiso caidën shubun icquido Esus tantiaquidtedi. ¹² Nëidic chido Tidipena chedo Tidiposa caidbëdi. Aido Esus tantiec dayacquio icquin ambi chi-acpadomboen nabanquido nec. Nëidic chido utsi Pedsida caid con chu icbobimboecquidquio. Aidtsen Esus tantiec dayacquio icquin ambi chiacpadomboen naquidquio nec. ¹³ Nëidic Dupo caid Nuquin Papan Esus tantiamiaidquio. Nëidic aton tita con tabimboecquidquio. ¹⁴ Nëidic Asinquidito caid. Nëidic Pedeconte caid. Nëidic Edmes caid. Nëidic Patëdobas caid. Nëidic Edmas caid. Nëidic abëd icquido Esus tantiaquido. ¹⁵ Nëidic Pidodoco caid aton chido Udiabëdi. Nëidic Nedeyo caid aton chuchubëdi. Nëidic Odimpas caid. Nëidic abëd icquido Esus tantiaquido. Aidedi chuiquin: —Mibi caic: “Unësquio iquec,” quiosh Pabado —cabanta.

¹⁶ Esus tantiaquido yec bëdamboec isnanta. —Mibi tantiëmbi —cananta. Nëmbo icquido Esus tantiaquidtedi mibi caic: —Unësquio iquec —quiosh. ¹⁷ Ëmbi tantiaido mibi neque. Tantia. Mibi chuinu. ¿Ada mibëdtan Esus tantiaquido chieshëmequin cuëshëdmequido icpec? ¿Ada Nuquin Papan chiaid mimbi tantiaid chienquio yec mibi icsamenuc muaquido icpec? Adquidobëd onquec tabadenda. ¹⁸ Nuquin Icbo Esuquidistun chiacpadomboen nainquio icquin ambi petequid-uidtsëqui aidon chieque. Aidon: —Mibi bëdambo iqueque. Ëmbi chiaid tantiat-quequin ambi chiacpadomboen namequin Esus tantiat-

sëcquid icsamec. ¹⁹ —Doma yacnocquido abi tantiec Esusën chiacpadec bëdamboec tabadosh —quequin mimbi naid chuibenesho dadpeshun tantiac caosh. Adsho tantiash bëdambo iquebi. Adecbidi Nuquin Papan chiaid tantiec bëdamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quiash aidbëdi icsainquo icta. ²⁰ Nuqui bëdamboen tabadmequid Nuquin Papa nec. Aidëmbi matses icsamequidquo Satanas chedo comapenen cuidendac. Nëbi Satanasën mibi icsametiadquo icsho tantiashun: —Satanas yuamenquo icnuen Nuquin Icbo Esusën abibi tantiamequiopashun —mibi caimbi.

²¹ Nëmbo icquidtedishun mibi tantiec. Mibi caic: —Unësquo iquec —quiosh Timoteyo ëbëdtan Esusën naid chuibenequidquo. Adembidi con matsesën chiosh. Dusio caid yec Ason caid yec Sosipated caid yec quec adosh.

²² Pabadon —Naden na —cac nëid dada uaquidquo Tesio caid nebi. Esus tantiaquid icquin ëmbitsen mibi tantiembi. Padi. Aidtedtsëqui ëmbimbo tantiaquin chuishun Pabadon chiaidbidi dada uaoaimbi.

²³ Nëidteditsen mibi caic: —Unësquo iquec —quiosh. Nëidic Cayo caid. Aidën shubun ushobi. Adnuc Esus tantiaquido iccuedednuec aton shubun pudued-puduedosh. Nëidic Edasto caid. Aid nëmbocquidon bedtequid bedbeneshun dayun uaquid nec. Nëidic nuquin utsibimboecquid Cuadto caid. Aidtedishun mibi aden tantiosh.

²⁴ Doma yacnocquido mibi tantiaquin: —Nuquin Icbo Esuquidistun bëdamboen isquin mibi bëdamboen tabadmepashun —caimbi.

²⁵ —Nuquin Papa bëdambo iquec —canuna. Esuquidistu chuibanquin ëmbi: —Aid tantiasho Nuquin Papan mibi bëdambo icmendac —quequin chiacpadomboen Esus tantiamequin Nuquin Papan mibi bëdamboen

tabadmetiadquio iquec. Ĕndenquimboshĕ Esus tishabi icnuc matsesĕn Esus chote bĕdamboen tantiambo icpampic. ²⁶ Adnubien Nuquin Papan unĕsesambo icquin con tsusedpabo utsi-utsien Esus chote chuiquin dada uamepampic. Nĕbi: —Esusĕn naid chuisho tantiaquin ma nidaid utsi-utsiec yacno tabadquidon Esusĕn chiacpadomboen nanu —qeshun Nuquin Papan Esusĕn naid chuibenequido icmiac. ²⁷ Aden namec Nuquin Papa bĕdambo iquec. Abipadquid utsi nibĕdec. Ambi natiapimbo ictequid nibĕdec. Abitedimbo tantiaquid nec. Nuqui cuidmenquio icnuec abided cuidadaid Esuquidistu tantiaشو Nuquin Papan nuqui bĕdamboen isequc. —Nuquin Papa bĕdambo iquec —canuna ĕnenquio icquin. Padi. Aidedi chuiquin dada uaombi.

Esuquidistu Chuiquin Tantiamete
New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

